

# Diidx Xcuent Jesucrist Nani Bacuaa San Marcw

## Baluii Juan ni rutiobnis

(Mt. 3:1-12; Lc. 3:1-9, 15-17; Jn.1 :19-28)

**1** Scree gusloj diidx xcuent Jesucrist, Xi'n Dios. <sup>2</sup>Si'cni bacuaa toIsaías, ni gunii xtidx Dios, che räjp Dios:

Bahuii gan, guxha<sub>l</sub>ä ni chanä xtidxä,  
ganidni chääni lojlu te guzucheeni xnezyujlu.

<sup>3</sup>Riejn xse' ni rbedxa' nez loj reyubijdz:

“Colyunsac xnezyuj Dad, colslui rexnezyulajzni.”

<sup>4</sup>Biricaj Juan ni rutiobnis nez loj reyubijdzga. Rägajcni nanabpac gusiechlajzreni, tiobnisgajczeni, te jia xtoj<sub>l</sub>reni. <sup>5</sup>Riädcuadiajg xhidajl reni rbäjz Judea, näjza reni rbäjz guedx Jerusalén. Dxejcti cheni ruxhobdoj<sub>l</sub>reni lo Dios, rustiobnis Juanreni nen<sub>l</sub> gueu Jordán.

<sup>6</sup>Xhajt Juan nacchee con guichlajd cameii, xsindoorni nacchee con guijd, niluxh gudajwni guxha't näjza dzunbäserguijxh.

<sup>7</sup>Caguluiini rebejn, rägajcni: —Detzä siääd tej nani sajcru loä, nani nicla di nungäj<sub>l</sub> surloä, cuää xcura'chni. <sup>8</sup>Narä abatiobnisä la'tu

con nis, biädla laani guxha<sub>l</sub>ni Sprit Dxa<sub>n</sub> xten Dios te cuääzni nen<sub>l</sub> lastootu. Si'c gustiobnis nani jiaäd detzä la'tu.

## Batiobnis Juan Jesús

(Mt. 3:13-17; Lc. 3:21-22)

<sup>9</sup>Dxejc, nen<sub>l</sub> redxejga, birii Jesús guedx Nasare't ni yu' Galilee. Dxejcru batiobnis Juan Jesús nen<sub>l</sub> gueu Jordán. <sup>10</sup>Che birii Jesús nen<sub>l</sub> nis, bahuiini bixal guibaa. siädyajt Sprit Dxa<sub>n</sub> xten Dios yejcti si'c te palom. <sup>11</sup>Dxejcti guibaali biejn xse' te ni räjp: —Luj najclu xi'nä ni sanälazä; rbanälazduxhälu.

## Bateed bendxab prueb Jesús

(Mt. 4:1-11; Lc. 4:1-13)

<sup>12</sup>Sas baxha<sub>l</sub> Sprit Dxa<sub>n</sub> xten Dios Jesús lo reyubijdz. <sup>13</sup>Dxejc guyu' Jesús ro'c tiuu dxej, guyu'ni cadro yu' reman. Sas gudiil bendxab nani rnibee, nani laa Satanás, xho niujnni te nusoo Jesús xtiidxni. Dxejcru biääd reangl xten Dios, biädhuiireneni.

## Gusloj Jesús xtzuumni

(Mt. 4:12-17; Lc. 4:14-15)

<sup>14</sup>Basälreni Juan nen<sub>l</sub> latzguiib. Dxejcti huij Jesús nez Galilee,

huiluini xtidx Dios. <sup>15</sup>Dxejc räjp Jesús:

—Abidzujñ dxej, luxh yälñibee xten Dios abidzujñ gajxh. Colšiejch lajztu, colchalilajz xtidx Dios.

**Gurejdx Jesús tajp bejn ni rniaaz bäjl**

(Mt. 4:18-22; Lc. 5:1-11)

<sup>16</sup>Sasajti Jesús nez ro' nis xten Galilee, che bahuini lo Simón näjza loj Andrés bejtz Simón. Cazälreni xquijxhrene lo nis, sa'csi rniaazrene bäjl. <sup>17</sup>Dxejc räjp Jesús lojrene:

—Coltanajl narä, te gunä cuedxtu bejn lacuaa ni guiniaaztu bäjl.

<sup>18</sup>Lagajc dxejc basa'nrene rexquijxhrene, sanätireni.

<sup>19</sup>Dxejc gusaj Jesús sche'n, sas bahuini loj Jacobo näj Juan, rexi'n Zebedeo. Cayunsa'creni xquijxhrene neñ xcanuureni. <sup>20</sup>Guredxgajcni guiro'preni, dxejcti laareni basa'nrene xtadrene Zebedeo neñ canuu, näjza rexmosni, sanätireni Jesús.

**Te bejn nani guyu' beñxab neñ lastooni**

(Lc. 4:31-37)

<sup>21</sup>Bidzujñtireni guedx Capernaum. Dxejcro sabd, dxej ni rusilajz rexpen Israel, biu' Jesús neñ guidobäz xten rexpen Israel. Dxejcti baluii Jesús rebejn ni tre' ro'c. <sup>22</sup>Bidxelojni rebejn xtiidxni, sa'csi caguluiinireni si'cpac te ni rnibee, xhet si'cdi remastr xten leiidi. <sup>23</sup>Neñ xquidobäzrene yu' te bejn yu' te beñxab neñ lastooni. Beñxabga guredxa', räjpni:

<sup>24</sup>—Jesús, ni siäd Nazare't, çxhicuent riu'lu loonu? ¿La siädgunitlojlu nuunu? Narä

numbeälu, luxh nanä luj najclu beñxan ni siäd lo Dios.

<sup>25</sup>Dxejcti guididxa' Jesús lo beñxabga, räjpni lojni:

—Basäuu ro'lu, birii neñ lastoo niguiire.

<sup>26</sup>Sas beñxabga batienguij niguiiga, luxh cabedxa'ni biriini neñ lastoo niguiiga. <sup>27</sup>Bidxejcti guiraareni, canabdiidx loj sa'reni:

—¿Xhi dee? ¿Xhi dzuun nacoobre ruluiini? Niguiire rnibeeni näj rebeñxab, luxh ruzoobrene xtiidxni.

<sup>28</sup>Di niaclaa gucbee rebejn guideb nez Galilee xhi rujn Jesús.

**Basiajc Jesús xnan suegr Pedr**

(Mt. 8:14-15; Lc. 4:38-39)

<sup>29</sup>Che biriireni xquidobäz rexpejn Israel, huinä Jesús Jacobo näj Juan roliz Simón näjza Andrés.

<sup>30</sup>Luxh xnan suegr Simón naga', yu'ni xliaa. Dxejc räjpreni lo Jesús: —Cayacxhuuni.

<sup>31</sup>Dxejcti gubig Jesús lojni, gunaazni ñaani, guläsnini; lagajc dxejc biriini xliaa. Dxejc gusloj cayunireni.

**Xhidajl beñracxhuu basiajc Jesús che huääz gubijdx**

(Mt. 8:16-17; Lc. 4:40-41)

<sup>32</sup>Che huääz gubijdx, luxh abiu' guxhijn, biädñareni guiraa rebeñracxhuu loj Jesús, näjza renani yu' beñxab neñ lastooni.

<sup>33</sup>Luxh guideb guejdxga bidojp ro' yu'ga. <sup>34</sup>Basiajc Jesús xhidajl renani rajc garen-garen yälguijdx. Niluxh gulääzani xhidajl beñxab, niluxh dini nusaan ninii rebeñxabga, sa'csi najnrene chu najcni.

### Baluu Jesús nez Galilee

(Lc. 4:42-44)

<sup>35</sup>Che bara yáäl, cäjyru bistie Jesús, biriini sääni te laad cadro ruti bejn. Ro'c cabejdx-canabni loj Dios. <sup>36</sup>Dxejcti Simón náj resa'ni huitiilreni Jesús. <sup>37</sup>Che bidxälrenini, rájpreni lojni:

—Guiraa rebejn caguillu.

<sup>38</sup>Dxejc rájp Jesús lojreni:

—Colcho' reguejdx ni yu' gajxh, te gusuleä xtidx Dios ro'c. Par ni'cpac biälä.

<sup>39</sup>Dxejcru cuansaj Jesús guideb nez Galilee, caguluiini xtidx Dios nen reguidobäz xten rexpejn Israel. Gunibeezani birii rebendxab nen lastoo xhidajl rebejn.

### Basiajc Jesús te bejn ni ral tiejxhni

(Mt. 8:1-4; Lc. 5:12-16)

<sup>40</sup>Gubig te beñracxhuu ni ral tiejxhni loj Jesús, bazuxhijbni. Dxejcti rájpnini lojni:

—Nará nanä sajc gusajclu narä palga rlaizlu.

<sup>41</sup>Balasaj Jesús beñracxhuuga, gunaazni naani, rápgajcni:

—Rlazä jiajclu. Biajc naj.

<sup>42</sup>Cheni guniini scree, biacgajc beñracxhuuga. <sup>43</sup>Dxejcti gulunejz Jesús bejnga. Per rápxgaani lojni:

<sup>44</sup>—Ahuire, rutlojdi guiniilu dee. Huilui tiejxhlu lo bixhojz. Badedgajc lo Dios nani rájp toMoisés gudeed bejn lo Dios si'c te seen, te gacbee rebejn abiajclu.

<sup>45</sup>Dxejc sää bejnga. Sas gusloj cayujyni diidx lo rebejn xcuent guiraa nani gujcnini. Ni'cni diru niajcdi niu' Jesús nicla tej guejdx. Cansajni te laad cadro ruti

bejn. Niluxh guiranejz rii rebejn, siädhuiireni Jesús.

### Basiajc Jesús te bejn ni di guniib

(Mt. 9:1-8; Lc. 5:17-26)

**2** Che agudejd balti dxej, biusac Jesús nen guedx Capernaum. Dxejcti biejn diajg rebejn arbäjzni. <sup>2</sup>Bidopgajc xhidalduxh bejn. Gudxaj nen yu'. Nicla rolä' di niajl nisiujreni. Dxejcti cagului Jesús xtidx Dios lo rebejn. <sup>3</sup>Dxejcti bidzujn tajp bejn, nuureni te bejn ni digacti guiniib; siädnärenini lo Jesús. <sup>4</sup>Luxh di niajcdi nidzujnreni cadro suga' Jesús, sa'csi yu' xhidajl bejn ro'c. Ni'c baxhalreni yejc yu' nejz cadro sujni. Dxejcru cadro baxhalreni basiäjtreni da' ni naga' beñracxhuuga lojni. <sup>5</sup>Che bahuii Jesús rililajzreni, dxejc rájpnini loj beñracxhuuga:

—Xi'nä, agubicaj rextojllu.

<sup>6</sup>Sas gaii bejn ni ruluii leii ni sobga' ro'c bejnreni xhigab nen lastooreni, naareni: <sup>7</sup>“¿Xhicuent rniiguiire scree? Caniyajni Dios; rut rajcdi rudzucaj dojl. iDioctis rajc rudzucaj dojl!” <sup>8</sup>Dxejcti gucbegajc Jesús xhi xhigab cayujnreni. Dxejc rájpnini lojreni:

—¿Xhicuent rujntu xhigab si'c nen lastootu? <sup>9</sup>¿La guyasiru gäbni loj beñracxhuure: “Agubicaj rextojllu”, o la gäbni: “Huistie, cua' xta'lu, gusaj?” <sup>10</sup>Baj naj, te gantu rajc rudzucaj Xi'n Dios, nani gujc Niguii, dojl lo guedxliujre, cania loj beñracxhuure:

<sup>11</sup>—Lojlu rniä, iHuistie, cua' xta'lu, huij rolizlu!

<sup>12</sup>Lagajc dxejc huistie beñracxhuuga, guläzni xta'ni,

hiriini ro'c nez loj guiraareni. Ni'cni bidxelo guiraareni. Dxejc gulá'preni xpala'n Dios, rájpreni:

—Gajdpacnu guihuii sa' dzuunre.

### Gurejdx Jesús Leví

(Mt. 9:9-13; Lc. 5:27-32)

<sup>13</sup>Dxejrcu gubisac Jesús ro' nis xten Galilee, luxh che bidoj guiraa rebejn lojni, baluini xtidx Dios lojreni. <sup>14</sup>Sasaj Jesús che bidxaagni Leví, xi'n Alfeo. Sobga'ni cadro rusquijxni rebejn. Dxejc rájpn Jesús lojni:

—Gudanajl narä.

Sas huisuni, sanajltini Jesús.

<sup>15</sup>Dxejc sobga' Jesús cayajwni rolizj Leví. Luxh sobganäj Jesús xhidajl reni rusquijx, nájza rebendoj] ni di chasanäj leii, nájza rexpejn pacni, lo mex. Xhidajlreni tre', luxh sanajlreni Jesús.

<sup>16</sup>Dxejrcu rebejn ni ruluu leii náj refarisee, che bahuiireni cayaunäjni renani rusquijx nájza rebendoj], rájpreni loj rexpejn pac Jesús:

—¿Xhicuent rbenäj xmastrtu reni rusquijx náj rebendoj], luxh raunäjnireni, ränäjnireni?

<sup>17</sup>Che biejn diajg Jesús xhi caniireni, rájpn lojreni:

—Renani nadip nadaan di guiquiin doctoor, per reni racxhuu rquuin doctoor. Dina niädtedxä rebensa'c, biädtedxä rebendoj], te gusiech lajzreni.

### Gunabdiidxreni loj Jesús xcuent yälrucua'n

(Mt. 9:14-17; Lc. 5:33-39)

<sup>18</sup>Cagucua'n rexpejn Juan náj rexpejn refarisee, renani najc rebenguidoo loj guedx Israel.

Dxejc biäd gaii bejn loj Jesús, gunabdiidxreni lojni rájpreni:

—¿Xhicuent cagucua'n rexpejn Juan náj rexpejn refarisee luxh rexpejn pacu di gucua'n?

<sup>19</sup>Dxejcti rájpn Jesús lojreni:

—¿La rucua'n rebejn ni rdon chää cadro ru' yälrucuanaa che meer suga' bi'n? Che meer suga' bi'n lojreni, direni gucua'n. <sup>20</sup>Per sidzujn dxej sibicaj bi'n lojreni, dxejc sii sucua'nreni.

<sup>21</sup>Rut rucuaadi tla' ladcoob loj tla' ladyux, sa'csi ladcoob rxu'nni luxh rutiäjzni ladyuxga, dxejc xhiroobruni rájs. <sup>22</sup>Rutza rusäl di bin ni gajd guilaj nen guidyux ni abigaa. Sa'csi bin ni gajd guilajga sutiäjzni guijdga che guilajni, luxh sinijt binga nájza guijdga. Ni'cni nanab gusäl ni bincoob nen guidcoobza.

### Batoj rebejn ni rinajl Jesús triuu sabd

(Mt. 12:1-8; Lc. 6:1-5)

<sup>23</sup>Te sabd, dxej ni rusilajz rexpejn Israel, sasaj Jesús nez loj reyuya'n. Sas gusloj rexpejn pacni caläädx doj lo triuu. <sup>24</sup>Dxejc rájpn refarisee, renani najc benguidoo loj guedx Israel, loj Jesús:

—Arniä, ¿xhicuent rujn rexpejn pacu dzuun ni di guchaag gunni nen dxej ni rusilajznu, ä?

<sup>25</sup>Dxejcti rájpn Jesús lojreni:

—¿La gajdtu gól nani bejn toDavid te huält, laani náj resa'ni, ä? Che biäd dx xhi gauureni, gulaanreni. <sup>26</sup>Biu' David nen xyu' Dios cheni guyu' toAbiatar loj Dios. Abiatar sajrcu loj rebixhojz ni guyu' nen xquidoo rexpejn Israel. Dxejc

gudajw toDavid reyätxtiil ni dzuub ro'c. Badeedzanini gudajw rebejn ni yunäjni. Luxh rebixhojztis rajc rajw yätxtiilga.

<sup>27</sup>Räjpza Jesús lojreni:

—Dios bejn dxe sabd sa'csi najnni naquiinpac gusilajz bejn. Dini niujn sabd te gapda bejnni. <sup>28</sup>Ni'cni narä, Xi'n Dios ni gujc Niguii, näjza sabd rnibeä.

### Niguii ni nabijdz te naani

(Mt. 12:9-14; Lc. 6:6-11)

**3** Biu' Jesús stehuält nen xquidobäz rexpejn Israel. Ro'c yu' te niguii nani nabijdz te naani.

<sup>2</sup>Niluxh ro'c cagula'tz rebejn Jesús don la susiajcní niguiiga sabd, dxej ni rusilajz rexpejn Israel, sa'csi rlaizreni cue'creni xquejni loj nani rnibee rexpen Israel. <sup>3</sup>Dxejc räjp Jesús lo niguii nani nabijdz naani:

—Huistie, guzuj galäiire.

<sup>4</sup>Dxejcti gunabdidxgajcni loj gaii rebejnga, räjpni:

—¿La laaca gunni dzunza'c, o la dzunguijdx, sabd, ä? ¿La suslaani yäl'nabajn, o la sugu'tni?

Luxh laareni biacdxireni. <sup>5</sup>Dxejc nadxe'ch bahuii Jesús lojreni, luxh guc-huin lajzni, sa'csi guc najd lajzreni. Dxejc räjp Jesús loj niguiiga:

—Baslii naalu.

Dxejcti basliini naani. Biajctini.

<sup>6</sup>Dxejcru biunejz refarisee.

Guslogajczeni caguchaagreni diidx con reni nadxaag Herodes, te don xho ju'treni Jesús.

### Xhidajl bejn bire' ro' nis

<sup>7</sup>Jesús näjza rexpejnpacni sääreni ro' nis, luxh xhidajl bejn

Galilee birinajlni. <sup>8</sup>Che gojnreni redzunro ni rujn Jesús, xhidajlreni biääd. Yu'reni birii Judea, yu'reni birii guedx Jerusalén, yu'reni birii Idumea, yu'zarení birii nejz stelaad gueu Jordán, biriizarení nez guedx Tiro, näj nez guedx Sidón, biädhuiireni loj Jesús.

<sup>9</sup>Ni'cni räjp Jesús loj rexpejnpacni quiilreni te canuu, te na'c gutää rebenxhidaalgani. <sup>10</sup>Abasiajc Jesús xhidajl benracxhuu, ni'cni guiraasi benracxhuu caxa't lojni, te canrenini te jiajcreni. <sup>11</sup>Niluxh che rhuii rebendxab lojni, ruzuxhijbreni lojni. Dxejcti rbedxa'reni räjpreni:

—Luj najclu Xi'n Dios.

<sup>12</sup>Dxejcti Jesús gudidxa' lojreni te na'c niäjbreñi chu najcni.

### Gule Jesús tzubitiop bejn loj reni rinajlni

(Mt. 10:1-4; Lc. 6:12-16)

<sup>13</sup>Birii Jesús sääni lo te dajne' cadro gurejdxni renani rlaizni cueni. Gubigtireni lojni. <sup>14</sup>Dxejcti guleni tzubitio'preni te sanäjreni laani, te guxhañireni chaluiireni xtidx Dios; <sup>15</sup>te ga'preni yäl'rnibee te gusiajcreni benracxhuu, te cuääzarení rebendxab.

<sup>16</sup>Retzubitio'p bejn ni gule Jesús najc: Simón, ni gulälajzani Pedr.

<sup>17</sup>Dxejcti Jacoob con Juan, rexi'n Zebedeo, gulälaj Jesús Boanerges. Con xtiidxnu sälojni bejn ni nasesya', si'c guzii. <sup>18</sup>Näj Andrés, Felipe, Bartolomé, Mateo, Tomás, Jacoob xi'n Alfeo, Tadeo, Simón, ni di guidxejb rnigajc, <sup>19</sup>näj Judas Iscariot, ni bato' Jesús loj reni rdxechlajz lojni. Sä'tireni rolizj te dade'.

**Yälrnijaj loj Sprit Dxan xte Dios***(Mt. 12:22-32; Lc. 11:14-23; 12:10)*

<sup>20</sup>Dxejc bidopsac rebenxhidaalga; nicla niajc niaunäj Jesús rexpejnpacni. <sup>21</sup>Che biejn diajg resa' Jesús dee, biädxhiirenini, sa'csi naareni, yejcní cayajc.

<sup>22</sup>Rebejn ni ruluii leii ni birii guedx Jerusalén bidzujnza lo Jesús, dxejc räjpreni:

—Beelzebú, nani rnibee rebendxab, yu' nen lastoo niguiire. Niluxh nani rnibee rebendxab rudeed yälrnibee lo Jesús te cuääni bendxab.

<sup>23</sup>Dxejc gurejdx Jesús rebejnğa, bijyni te cuent ni ruluii lojreni, räjpni:

—¿Xho gurilaagw bendxab lagajc sabendxabni? <sup>24</sup>Palga rebejn xten te yälrnibee la'reni, luxh tilnäjä te cuaani ste cuaaga, di yälrnibeega chu xchej. <sup>25</sup>Palga te famiḷ rdilnäjä lagajc sa'ni, di famiḷga chu xchej. <sup>26</sup>Palga bendxab nani rnibee tilnäjä lagajc laani, di xcälrnibeeni chu xchej, sa'csi ni'c gun luuxni.

<sup>27</sup>Rut gacdi jiu' rolizj te niguidaan, cuanni xhixhtenni, palga dini gulibxgaani, si'ctis sajc cuanni xhixhtenni.

<sup>28</sup>Rniliápac lojtu guiraa dojl näjza yälrnijaj xten rebejn sajc jia. <sup>29</sup>Nani guiniyaj Sprit Dxan xten Dios, digacdi guibicaj rextojḷni, anuutisni xtojḷni par tejpas.

<sup>30</sup>Räjpni si'c sa'csi caniiireni yu' bendxab nen lastooni.

**Xnan con rebetzhuin Jesús***(Mt. 12:46-50; Lc. 8:19-21)*

<sup>31</sup>Dxejcru bidzujn xnan Jesús, näj rebetzhuinni. Direni niu',

baxhaltisreni chu huitejdxni.

<sup>32</sup>Rebejn ni sobga' gabi Jesús räjpreni lojni:

—Xnanlu näj rebejtzlu suga' ro lä', caguuilreni luj.

<sup>33</sup>Dxejcti räjp Jesús lojreni:

—¿Chu reni'c najc xnanä näj rebetzä?

<sup>34</sup>Bahuigajcni loj renani sobga' gabini, dxejc räjpni lojreni:

—Redee najc xnanä, rebetzä.

<sup>35</sup>Chutis ni rujn ni rlaiz Dios, ni'c najc betzä, bisianä, näjza xnanä.

**Xcuent niguii ni sale'c binij***(Mt. 13:1-23; Lc. 8:4-15)*

**4** Suga' Jesús ro' nis guslosac caguluiini xtidx Dios, luxh bidojp xhidajl bejn cadre suga'ni. Xhidalduxh najcreni, ni'cni biu' Jesús nen te canuu ni suga' ro' nisga. Dxejcti gurejni nenga, biääd guiraa bejn bia'ntireni ro' nis. <sup>2</sup>Dxejc baluiinireni guiraloj, ganax cuent ni ruluii guniini. Che caguluiini, räjpni lojreni:

<sup>3</sup>—Gucuadaiajgtu dee. Guyu' te niguii. Biriini sale'cni binij. <sup>4</sup>Che guslojni cabe'cni, yu' lajt biajb binijga cuä' nezyuj. Sas biääd reman xhaguibaa, gudajwreni binijga. <sup>5</sup>Stee lajt biajb binijga nen guij cadre xheti xhidajl yuj. Binijga gulengajcni, sa'csi xheti xhidajl yuj ro'c. <sup>6</sup>Dxejc, sa'csi lo jiaa yu' xlobaani, che birii gubijdx, bigolḷni, gubijdzitini. <sup>7</sup>Stee lajt biajb binijga nen yaguejch. Dxejcti biroob reyaguejchga, luxh bejnreni balaa loj binijga, ni'cni gujcní ganax bilii. <sup>8</sup>Per stee lajtga biajb binij lo yusa'c. Gulejn reyäljga, guroobreni, gucsa'ceni. Yu'reni cuaj galbitzuo

xob, yu'reni cuaj gayojñ xob, yu'zareni cuaj tegayuu xob.

<sup>9</sup>Dxejc räjpni lojreni:

—Chutis ni rlanj guisieed, sucuadiajgni.

<sup>10</sup>Che asii xhidajl bejn, rebejn nani suga' gajxh cadro suganäj Jesús guitzubitio'p xpejn pacni gunabdiidx lo Jesús xhi säloj cuentre. <sup>11</sup>Dxejc räjp Jesús:

—Dios abejn gacbeetu te gantu xho najc yälxhiga'tz xten xcälrnibee Dios nani najc xhiga'tz najli. Niluxh lo ste'ca bejn con cuenttis rniä guiraa recosre, <sup>12</sup>te mase cahuiireni direni gumbee, te mase cayiejn diajgreni, direni gacbee. Scree gacni, te na'c gusiejch lajzreni, te na'c guibicaj xtojlni.

<sup>13</sup>Räjpzani lojreni:

—¿La ditu gacbee cuentre? ¿Xhocha gacbeetu xhidajlru cuent?

<sup>14</sup>Niguiire nani sale'c binij najc si'c te nani ruluii xtidx Dios. <sup>15</sup>Yu' bejn ni najc si'c binij ni biajb cuä' nezyuj: riejn diajgreni xtidx Dios nani ruluii bejn. Dxejc che jiejn diajgreni xtidx Dios, riääd Satanás rbägajcni xtidx Dios ni yu' neñ lastooreni. <sup>16</sup>Yu'za rebejn ni najc si'c binij ni biajb neñ reguij, renani che jiejn diajgreni xtidx Dios, rbaa lajzreni rca'reni diidxga. <sup>17</sup>Niluxh direni nisiudzu'tz, sa'csi guxii huilii lajzreni. Che rdejdreni trabajw o che rusacsj bejnreni xcuent xtidx Dios, rusaanreni xtidx Dios. <sup>18</sup>Yu'zareni najc si'c binij ni biajb neñ yaguejch, riejn diajgreni xtidx Dios, <sup>19</sup>dxejc che ru'rurenii yärsia' xcuent recos guedxliujre, rsia' lajzreni ga'preni meel, rlanjreni ga'prurenii guiraloj recos, dxejc riu'

redee neñ lastooreni, rusäuuni lo xtidx Dios, xlia'si biejn diajgreni xtidx Dios. <sup>20</sup>Yu'za bejn ni riejn diajgreni xtidx Dios, rlii lajzreni diidxga, xhet xlia'ti biejn diajgreni xtidx Dios. Najczeni si'c binij ni biajb loj yusa'c. Yu' rebejn ni najc si'c nani cuaj galbitzuu xob lojni, yu'za rebejn ni najc si'c nani cuaj gayojñ xob lojni, yu'za rebejn ni najc si'c nani cuaj tegayuu xob lojni.

### **Xhet yuchetzu'tzdi ni di guidzujñ dxej sisäbdiidx**

(Lc. 8:16-18)

<sup>21</sup>Räjpza Jesús lojreni:

—¿La riädñatu te bajl te suuni dejtz te alm, o neñ te loon, ä? ¿La xhet nanabdi suuni jiaa te guzanijni, ä? <sup>22</sup>Xhet yuchetzu'tzdi ni di guidzujñ dxej sisäbdiidx. Xhetiza xhicos naga'tztis. Naga'tzni naj, niluxh sidzujñ dxej sule'ni. <sup>23</sup>Pal yu' chu rlanj guisieed, sucuadiajgni.

<sup>24</sup>Räjpza Jesús lojreni:

—Colyunxgaa xhigab rediidx ni riejn diajgtu. Nani rusäلتu loj xhigabtu, ni'cza guniidx Dios xca'tu, luxh sisiojbru yejc ni xca'tu. <sup>25</sup>Renani rajp che'n yälñajn, lojreni sudeedru Dios yälñajn. Luxh renani xhetru rusäldi loj xhigabreni, sudzucaj Dios yälñajn nani rajpreni.

### **Xcuent binij ni roob**

<sup>26</sup>Guniiza Jesús lojreni:

—Yälrnibee xten Dios najc si'c rsiajc te niguii che rbe'cni binij lo yuj, <sup>27</sup>dxejc yäl riguesni, rdxee ristieni, dxejcti rliejn binijga, luxh di niguiiga gan xho roobni. <sup>28</sup>Acanajn yujga rajc binij lojni. Galoo rii cuane'ga, sas rii doj lojni. Dxejrcu rdxaj bejdze' neñ

dojga. <sup>29</sup>Dxejcti che aguyajl bedze'ga, ruxhalni chu rituuigni, sa'csi abidzujn dxej ni guidojpn.

**Xcuent bedz muxhtas**

(Mt. 13:31-32; Lc. 13:18-19)

<sup>30</sup>Räjpza Jesús:

—¿Xhini'c najc si'c najc xcälrnibee Dios? ¿Xhi te cuent guiniinu te guiluiununi? <sup>31</sup>Si'c te bedz muxhtas ni rbej loyuj, si'c najcni. Bedz muxhtas najcni bedz bāze'ru loj guiralii bedze' ni yu' loj guedxliuj. <sup>32</sup>Dxejc che agurejni, roobni, rajcni yagroru loj recuaan. Dxejcti roob rexajcwni te rajc rujn reman xhaguibaa xpitiääzni nen xpałaani.

**Si'c baluii Jesús ganax con cuent**

(Mt. 13:34-35)

<sup>33</sup>Si'c ruluii Jesús rebejn xtidx Dios guiniini xhidal cuent sa' redee, si'ctis ni rajc racbeereni. <sup>34</sup>Con recuent ni ruluiitis gunii Jesús lojreni. Niluxh lo rexpejn pacni basule'ni guiraa recuente.

**Rusiacdxi Jesús bej näj nisdoo**

(Mt. 8:23-27; Lc. 8:22-25)

<sup>35</sup>Lagajc gudxejga räjpni loj rexpejn pacni:  
—Colcho', chonnu stelaad nis xten Galilee.

<sup>36</sup>Basa'ntireni rebejn, sanätireni Jesús nen canuu cadro sobgajcni. Dxejcti sgaii canuu sanajlni.

<sup>37</sup>Chela gubi' te beduxh, gusloj cayu' nis nen canuuga. Cadxaj canuuga nis. <sup>38</sup>Nagayejs Jesús dejt canuuga, nagayejsni. Bacuäänreni Jesús, räpgajczeni lojni:

—Dad mastr, əla dilu jiu siääznu nen nis, ə?

<sup>39</sup>Dxejc huistie Jesús, gudidxa'ni lo bejga, räjpzani lo nis:

—Guredxi.

Gulāzgajc bej, biacdxi. <sup>40</sup>Räjp Jesús loj rexpejn pacni:

—¿Xhicuent cadxebduxhtu? ¿La ditu chalilajz xtidxä, ə?

<sup>41</sup>Luxh laareni bidxelojreni, räjpreni loj sa'reni:

—¿Chucha dee ni rnibee bej con nis, luxh ruzoobreni xtiidxni?

**Nigui Gadara ni yu' bendxab nen lastooni**

(Mt. 8:28-34; Lc. 8:26-39)

**5** Bidzujntireni stelaad ro' nisga, lo yuj xten Gadara. <sup>2</sup>Si'ctis ni birii Jesús nen canuu, biādgajc te niguii lojni ni birii nen rebiliää cadro rga'tz bengut. Yu' bendxab nen lastoo niguiiga. <sup>3</sup>Rbājzni nen rebiliääga luxh rut rajcni rucuaduuni, nicla con cadenguiib. <sup>4</sup>Xhidajl huält agacbacuaduureni ni', naa niguiiga con cadenguiib, luxh litis batiuugni recadenguiibga, rut rajcni rusiacdxi. <sup>5</sup>Si'ctis canzajni, dxej, yääl. Rbedxa'ni nen redajn, nen rebiliää, luxh cagutiugni tiejxhni con reguij. <sup>6</sup>Che bahuiini loj Jesús zijtru, baxunni huichaglojni Jesús, bazuxhijbni lojni. <sup>7</sup>Dxejcti rbedxaduxhni, räjpni:

—¿Xhicuent siäädlu loä, Jesús, Xi'n Dios ni yu' jiaro? Rniabä lojlu nez loj Dios na'c gusacsılu narä.

<sup>8</sup>Sa'csi agac cayəjb Jesús lojni:  
—Luj, bendxab, birii nen lastoo niguiiga.

<sup>9</sup>Dxejcti gunabdiidx Jesús räjpni:  
—¿Chu laalu?

Dxejc räjpni:  
—Narä laä Legiön, nani säloj xhidalro, sa'csi xhidajl najcnu.



<sup>10</sup>Sanuutis canabni lo Jesús na'c guxhałni rebendxabga ste'ca guejdx.

<sup>11</sup>Ro'c tre' xhidalduxh cuch cu'á' dane'ga, cayajwreni. <sup>12</sup>Dxejc gunab rebendxabga loj Jesús, rájpreni: —Baxhał nuure loj recuchre te jiu'nu nen lastooreni.

<sup>13</sup>Dxejcti basaan Jesúsreni. Biriiti rebendxabga nen niguiiga, dxejc biu'reni nen lastoo recuchga. Yu' si'cti tiop mił cuch ro'c. Baxun recuchga, dxejc birolreni ro' guilaj, bitejbreni nen nis, gujttireni nen nisga.

<sup>14</sup>Renani cayajp recuchga baxunreni, huiyeiireni diidxga nen guejdx, nájza loniaa. Dxejc biäd bejn biädhuui nani gujc ro'c. <sup>15</sup>Che bidzujnreni cadre suga' Jesús, bahuiireni loj niguii nani guyu' rebendxabga nen lastooni. Sobga'ni ro'c, najcwni xhajnbi luxh nasa'c yejcni. Niguiire najc nani guyu' bendxab ni laa Legión nen lastooni. Bidxejbtí rebejn nani bahuii lojni.

<sup>16</sup>Dxejcru rebejn ni bahuii xhi gujc ro', huiyeiireni diidx xho guzajc niguiire nani guyu' bendxab nenni galoo, nájza nani guzajc recuch.

<sup>17</sup>Dxejc gosloj canabreni loj Jesús jijunejzni.

<sup>18</sup>Che biu' Jesús nen canuu, niguii nani guyu' bendxab nen lastooni gunabni loj Jesús, rájpní:

—Huinä narä.

<sup>19</sup>Per di Jesús nusaan nijni. Rájpn Jesús lojni:

—Huij rolizjlu, lo resa'lu. Huiyeii diidx lojreni xho bennäj Dadlu, nájza xho balaslajzni luj.

<sup>20</sup>Sä'ti niguiiga, gosloj cayujyni diidx nen reguejdx xten Decápolis xho bennäj Jesúsni. Guiraa rebejn bidxeloj.

### Xindxa'p Jairo nájza gunaa ni bahuał xhajn Jesús

(Mt. 9:18-26; Lc. 8:40-56)

<sup>21</sup>Che bidzunšac Jesús stelaad ro' nisga nen canuu, bidzujn xhidalduxh bejn cadre suga'ni. Bia'nti Jesús ro' nisga. <sup>22</sup>Dxejcru biäd te niguii nani laa Jairo, ni rnibee nen xquidobáz rexpen Israel. Che bahuiini loj Jesús, bazuxhijbni lojni. <sup>23</sup>Canabpacni lojni, rájpní: —Xindxapä'ä acayejt. Gudaa, guzujlu naalu yejcni, te jiajcní, te guibajnni.

<sup>24</sup>Sanäti Jesús bejnga. Xhidajl bejn sanajłni, luxh cagutäärenini. <sup>25</sup>Loj rebenxhidaalga yu' te gunaa ni agujc tzubitio'p ijz racxhuuni yälguidxbäi. <sup>26</sup>Agudedduxhni trabajw, abahuii xhidajl doctoorni. Xlia'si abanijtni guiraa nani rajpni, luxh xhet racnäjdini, alga rxuuruni. <sup>27</sup>Sa'csi biejn diajgni xhini'c canii rebejn xcuent Jesús, gubig gunaaga nez dejtz Jesús, guideb nen rebejn, bahuałni xhajn Jesús. <sup>28</sup>Cayujnni xhigab, naani: “Palga narä falä xhajtisni, siacä.” <sup>29</sup>Lagajc dxejc guläjz caxe' xtiejnni, gucbeeza tiejxhni abirii xcälracxhuuni. <sup>30</sup>Gucbegajc Jesús yu' chu abasiajcní. Gubiregajcní nen rebenxhidaalga, rájpní:

—¿Chuni'c bahuał xhabä?

<sup>31</sup>Dxejcru rájpní rexpejn pacni lojni: —Rhuiliu benxhidaal cagutäälü, luxh naalu: “¿Chuni'c bahuał xhabä?”

<sup>32</sup>Sas cahuii Jesús nez ree, nez rec, te fiini loj nani bahuałni.

<sup>33</sup>Dxejc bidxejb gunaare, racejsni, sa'csi gucbeeni xhini'c gujcní. Dxejc

biäädni, bazuxhijbni loj Jesús, räbliini loj Jesús guira'ti ni bejnni.

<sup>34</sup>Dxejc räjp Jesús lojni:

—Xindxa'pä, abiajclu sa'csi huililajzlu. Gulecdxi lajzlu, huij rolizlu, abiajc xcälracxhuulu.

<sup>35</sup>Canisijc Jesús si'c che bidzujn renani birii rolizj dade' ni rnibee nen xquidobáz rexejn Israel.

Räjpreni:

—Agujt xindxape'lu. ¿Xhicuent rusieedrulu Dad mastr?

<sup>36</sup>Dxejc che biejn diajg Jesús nani caniireni, räjpni lo dade'ga:

—Na'c guidxejblu. Bililajztis.

<sup>37</sup>Luxh dini nusaanru nij chu ninäni, Pedrtis näj Jacoob näjza Juan bejtzni. <sup>38</sup>Che bidzujnni rolizj dade'ga, bahuii Jesús bieje ni cayujn rebejn ni rbedxa' roon.

<sup>39</sup>Biu'tini räjpni:

—¿Xhicuent rujntu si'c? Gajd dxape're guet. Nagayejssini.

<sup>40</sup>Alga baxhiznäjrenini. Dxejc gunibee Jesús birii guiraa rebejnnga. Dxejcti huinäni xcuzajñ dxape'ga con renani sanäni. Biu'reni cadro naga' dxape're. <sup>41</sup>Gunaazni ñaa dxape'ga, dxejc räjpni:

—Talita cumi —nani säloj con xtiidxnu: Dxape', lojlu rniä, huistie.

<sup>42</sup>Dxejcti huistiegajc dxape'. Tzubitio'p ijz yu' dxape'ga. Bidxeloduxh rebejn ni bahuii guläs Jesús dxape'ga. <sup>43</sup>Dxejc balijdx Jesús reni te rut lojdi chaye'tzreni xhini'c gujc. Gunibegajcni gudeedreni xhi gauu dxape'ga.

**Che guyu' Jesús Nazare't**

(Mt. 13:53-58; Lc. 4:16-30)

**6** Dxejcru birii Jesús ro'c, huijni lajdxni, sanäzani

rexpejnpacni. <sup>2</sup>Che bidzujñ sabd, dxej nani rusilajz rexejn Israel, gusloj caguluiini nen xquidobáz rexejn Israel. Bidxeloj xhidajl bejn nani biejn diajg rextiidxni, räjpreni:

—¿Caro bisieed niguiire guiraa recosre? ¿Xhi yälñajnre cua'ni ni'c rajc rujnni rextzunduxh Dios con ñaani? <sup>3</sup>¿La xhet laadi carpinteer, xi'n Marii, bejtz Jacoob, näj José, näj Judas, näjza Simón dee, ä? ¿La xhet reedi rbäjz rebisianhuinni?

Luxh bidxechlajzreni lojni. <sup>4</sup>Dxejc räjp Jesús lojreni:

—Catis rinälajzreni te ni rnii xtidx Dios. Lajdxtisni, lagajc loj resa'ni, rolizjtisni, ro'c rut rinälajzdini.

<sup>5</sup>Luxh di niajcdi niujñ Jesús xhidajl milaagwr ro'c. Tiopchontis benracxhuu basiajcnii, bazujni ñaani yejcreni. <sup>6</sup>Bidxelo Jesús sa'csi di lajzreni nilii. Caguluiitini nen guiraa reguejdx'e' ni ria'n gajxh nejzga.

**Baxhaj Jesús tzubitio'p bejn ni rinajlni chaluiireni xtidx Dios**

(Mt. 10:5-15; Lc. 9:1-6)

<sup>7</sup>Dxejcru gurejdxni guitzubitio'p xpejnpacni. Gusloj caguxhañni tiopgajreni; badeedzani yälñrnieb lojreni te guinibeereni loj rebendxab. <sup>8</sup>Gunibeeni xhet chanädireni lo nejz, ganaxhtis te yajg te sanäjreni. Di nungäjñ chanäreni nicla bisiuud, nicla yätxtiil, niclaza meel nen dobdäjñ. <sup>9</sup>Nungäjñlza xcaj gura'ch ni'reni, nägajc ga'preni tejtis gamangw, xhet tio'pdini. <sup>10</sup>Dxejcti räjpni lojreni:

—Cadrotis jiu'tu nen te guejdx, coljia'n nen tejtis yu' guiraa redxej

ni chutu guejdxga. <sup>11</sup>Palga yu' te guejdx cadro direni gusaan jiu'tu luxh di rlanjreni cuadiajgreni diidx ni sanātu, colr̄ii guejdxga, colcuijb guxhuj ni'tu si'c te seen te gacbeereni xhet laadi bejnreni. Rniliápac lojtu, guxiiru trabajw ted reben̄ Sodoma náj reben̄ Gomorra quela rebejn̄ ni yu' guejdx cadro direni gusaan jiu'tu.

<sup>12</sup>Dxejc biriireni, sääreni. Cayäbgajczeni nanabpac gusiejch lajz rebejn̄. <sup>13</sup>Gulääzaren̄i xhidajl ben̄dxab dxejcti gudääbreni se't yejc xhidajl ben̄racxhuu, luxh białczeni.

#### **Xcälgujt Juan ni rutiobnis**

(Mt. 14:1-12; Lc. 9:7-9)

<sup>14</sup>Herodes najc nani rnibee dxejc. Biejn diajgni xpala'n Jesús, sa'csi guiralii rebejn̄ calá'p xpala'n̄ni. Dxejc rájp Herodes:

—Juan nani rutiobnis ahuájs loj rebengut, ni'c rajc ruj̄ni remilagwre.

<sup>15</sup>Sgairi bejn̄ rájp:

—Laa Elías ni gunii xtidx Diosni.

Sgaireni rájp:

—Laa te bejn̄ ni rnii xtidx Dios, o sa' te rebejn̄ ni gunii xtidx Dios agujc xchero.

<sup>16</sup>Che biejn diajg Herodes si'c, rájpni:

—Laa Juan dee, nani gunibeä biru' yej̄cni, luxh náj agubansacni loj rebengut.

<sup>17</sup>Sa'csi lagajc Herodes gunibeä biga' Juan, dxejc bacuaduurenini con cadenguiib nen̄ latzguiib, xcäl̄nasa'c Herodías. Herodías gujc chäǟl Lib, bejtz Herodes, dxejc cua' Herodes gunaaga si'c chäǟlni.

<sup>18</sup>Rájp Juan loj Herodes:

—Xhet laadi rbäznäjlu chäǟl bejtzlu.

<sup>19</sup>Ni'cni rdexchlajz Herodías loj Juan, luxh rlanj̄ni ju'tnini, luxh di niajcdini <sup>20</sup>sa'csi rdxejb Herodes Juan, sa'csi naj̄ni bensa'c, ben̄dxan najc Juan, ni'cni dini nusaan niuj̄n Herodías latsiaj̄ni. Mase dini gacbesa'c ni rnii Juan, rucuadiagsa'cni xtiidx̄ni. <sup>21</sup>Niluxh guyu' xmood Herodías. Che goj̄l laj Herodes, bayaanni rexpej̄ni ni rnibee, nájza rebejn̄ nani saj̄c nez región Galilee. <sup>22</sup>Dxejcti biu' xinx̄a'p Herodías cadro cayajwreni, baya'ni nez lojreni. Bidxaglazduxh Herodes nájza rexpioozni baya' gunaaga, xinx̄a'p Herodías. Dxejc rájp Herodes lo gunaaga:

—Gunab ni rlanj̄tisl̄u loä, narä sunidx̄ani.

<sup>23</sup>Dxej̄cru räplii Herodes loj̄ni:

—Sunidx̄a xhitis ni guiniabl̄u.

Mase gala' yuj̄ ni rnibeä.

<sup>24</sup>Biriitini nen̄ yu', huiye'tz̄ni loj xnanni, rájp̄ni:

—¿Xhini'c guiniabä loj̄ni?

Dxejc rájp̄ xnanni loj̄ni:

—Gunab yejc Juan ni rutiobnis loj̄ni.

<sup>25</sup>Huigajcni loj̄ reii, sas gunabni loj̄ni, rájp̄ni:

—Rlazä gunidx̄gaj̄clu loä yejc Juan ni rutiobnis. Nen̄ te pla't baniid̄x yej̄cni.

<sup>26</sup>Dxejcti guc-huinduxh lajz Herodes, sa'csi abadeedni xtiidx̄ni loj̄ni, luxh sa'csi abiej̄n diajg renani sobganäj̄ni lo xmex̄ni, ni'c dipac rlanj̄ni nudxoj̄ni nani gunab gunaaga loj̄ni. <sup>27</sup>Baxhal̄gajc reii te soldaad ni rcanäj̄ ro'c, baxhal̄n̄ini, te chaxiini yejc Juan. <sup>28</sup>Ni'c huij̄,

dxejcti bagu'tni Juan neñ latzguiib, biädnätini yejc Juan neñ te pla't. Badeedtinini loj gunaaga. Dxejcti gunaaga badeednini loj xnanni.

<sup>29</sup>Che biejn diajg rexpejnꝑac Juan si'c, biädläsreni togoolga. Dxejcti bacua'tzrenini neñ te baa.

### Bayaan Jesús gaii mil bejn

(Mt. 14:13-21; Lc. 9:10-17; Jn.6 :1-14)

<sup>30</sup>Che gubi' renani baxhaḷ Jesús, bijreni diidx guiraa ni bejnreni nájza ni baluiireni. <sup>31</sup>Dxejc rájp Jesús lojreni:

—Colṭaa, xtebnu chonnu cadro rut rbájzdi, guisilaznu tudxe'n.

Rájp Jesús si'c sa'csi yu' xhidajl bejn ni sää, ni siääd, nicla gal gauureni. <sup>32</sup>Dxejcti sääreni neñ te canuu cadro rut rbájzdi. <sup>33</sup>Bahuii xhidajl bejn sääreni, biembeereni Jesús. Dxejc xhidajlreni huini' ro'c, xhidajl guejdx biriireni, ganidreni bidzujñreni loj Jesús nájza rexpejnꝑacni, dxejcti bidojpreni lojni. <sup>34</sup>Birii Jesús neñ canuu, bahuiini loj beñxhidaalga. Dxejc balazlajznireni, sa'csi najcreni si'c rexiil ni ruti baxtoor xtenreni. Dxejc gusloj caguluiinireni guiraloj. <sup>35</sup>Che gojḷ gudxey, gubig rexpejnꝑacni lojni, rájpreni:

—Rut rbájzdi ree, luxh agudxey náj. <sup>36</sup>Baxhaḷ rebejn te cháäreni lo reguejdx, nájza reñench, te chasiireni yätxtiil gauureni sa'csi xheti xhi gauureni ree.

<sup>37</sup>Dxejc rájp Jesús lojreni:

—La'tu colḷeed xhi gauureni.

Dxejc rájpreni loj Jesús:

—¿Xhixh sajl tiop gayuu meel yätxtiil chosiinu gauu guiraa rebeñxhidajlre?

<sup>38</sup>Dxejcti rájp Jesús lojreni:  
—¿Bal yätxtiil rajptu? Colchahuii.  
Che gojnreni balni dxejc rájpreni:  
—Gaii yätxtiil, nájza tiop bájḷ.

<sup>39</sup>Dxejcru gunibee Jesús rájpreni loj guiraa rebejn:

—Colcuej xcua-xcuaatu loj guixhaya'.

<sup>40</sup>Sas gurej xcua-xcuaareni. Yu' lajt gurej tegayuureni, yu' lajt gurej garol gayuureni. <sup>41</sup>Dxejcti cua' Jesús guigaii yätxtiilga nájza guiro'p bájḷga, bahuiini xhaguibaa, badeedni xquixhtios loj Dios. Dxejcti gula'ni yätxtiil nájza guiro'p bájḷ, badeednini loj rexpejnꝑacni te badeedrenini loj guiraa rebeñxhidaalga. <sup>42</sup>Dxejc gudajw guiraaareni, gudxaj xque'reni. <sup>43</sup>Dxejcru batojpreni tzubitiop dxijm guidxadoo yätxtiil nájza bájḷ ni bia'n. <sup>44</sup>Luxh loj guiraa rebejn ni gudajw yu' si'cti gaii mil niguii.

### Guzaj Jesús loj nis

(Mt. 14:22-27; Jn.6 :16-21)

<sup>45</sup>Gunibee Jesús jiu' rexpejnꝑacni neñ canuu, chägajcreni Betsaida, ni tre' dejtz nis stelaad, laḷni cagusadiidxni rebejn. <sup>46</sup>Che gulujx basadiidxnireni, sääni neñ redane', sanabni lo Dios. <sup>47</sup>Cheni acayu' guxhijñ, yu' rexpejnꝑacni neñ canuu galäii nis laḷ ni suga' Jesús xtebni ro' nis. <sup>48</sup>Dxejcti bahuii Jesús abadxajgreni cagusajreni xcanuureni, sa'csi säbduxh bej. Bejga rulanaareni nez dejtzreni stehuält. Dxejcru che acara yääl, gusaj Jesús loj nis, huijni cadro sasajreni, rñajzni ninijdni lojreni. <sup>49</sup>Dxejc che bahuiireni sasaj Jesús loj nis, naareni pet te beñmalni,

ni'c guredxa'reni. <sup>50</sup>Guiraareni bahuiireni lojni, bidxebduxhrene. Sas gunigajcni lojreni, räjpnı: —Colsutıjı lajztu. Laa naräni. Na'c guidxejbıtu.

<sup>51</sup>Dxejcti huä'p Jesús nen canuu cadro yu'reni. Lagajc dxejc biacdxı bej, luxh laareni bidxeloduxhrene, <sup>52</sup>sa'csi direni niacbee xhini'c bennäj Jesús reyätxtiil. Guc najd lajzreni, ni'c direni niacbee.

**Basıajc Jesús rebenracxhuu nen guedx Genesare't**

(Mt. 14:34-36)

<sup>53</sup>Gudejdreni lo nis, bidzujnreni lo yuj xten Genesare't. Ro'c bacuadaureni canuu ro' nis. <sup>54</sup>Che biriireni nen canuu, biembegajc rebejn Jesús, <sup>55</sup>dxejcti birii rebejn guideb nejzga. Guslojti siädnäreni benracxhuu loj Jesús, naga' rebenracxhuuga lo da'. Cadrotis riejn diajgreni yu' Jesús riädnäreni rebenracxhuu. <sup>56</sup>Niluxh cadrotis rij Jesús, nen reguedxbäz, nen reguedxro, näjza loj rerench, rguixhrene rebenracxhuu cadro rajc guii. Dxejcti rniabreni loj Jesús te gac caanreni xhajbni, niluxh bıajc guiralii renani gudajın xhajb Jesús.

**Nani runıjt lastoo bejn**

(Mt. 15:1-20)

**7** Dxejcti refarisee, renani najc benguidoo loj guedx Israel, näjza gaii rebejn ni ruluii leii, renani birii Jerusalén, bidojpreni loj Jesús. <sup>2</sup>Bahuiireni cayajw gaii rexpejnıpac Jesús, luxh canii rebejn nacdxuudx naareni (dee säloj direni quiib naareni si'ctis ni rdiib naa reben lajdxrene). Ni'cni gunıyajreni

rexpejnıpac Jesús. <sup>3</sup>(Guiraa rebejn xten Israel, näjza refarisee, sasanäj nani baluii rebengool ni yu' guedx Israelrene. Direni gauu palga direni quiib naareni balti huält. <sup>4</sup>Che rbi'reni rijreni lo guii, rguıbsa'creni naareni, lojreni, ni'reni, dxejcti rajc rajwreni. Niluxh guyu' xhidajl costumbr ni sasanäjırene, luxh yu' mood rguıbreni rextrastreni näjza rexplooreni, näjza rextrastguıbreni, näjza rexloonreni.) <sup>5</sup>Dxejc gunabdiıdx refarisee näjza rebejn ni ruluii leii loj Jesús, räjpreni: —ıXhicuent di rexpejnıpacu gun si'cni baluii rebengool, niluxh rajwreni guideb nacdxuudx naareni?

<sup>6</sup>Dxejcti gunii Jesús lojreni räjpnı: —ıBen guıjdx! Laaca gunii Isafas xcuenttu che guniini xtıdx Dios. Scree cajni loj guıjtz:

Guejdxre sanälajz narä con rextiıdxni,

niluxh lastooreni zıtro suga' loä.

<sup>7</sup>Xlia'si ruzuxhıjbreni, sa'csi direni chanälajz narä.

Ruluiireni si'c xtiıdxıpac Dios nani rnii rebejn.

<sup>8</sup>Rusa'ntu xleii Dios, sasanädzu'tztu costumbr nani baluii rebengool. Rdıbsa'c rexploortu, rextrasttu, luxh rujnzatu xhidajlrı cos sa' redee.

<sup>9</sup>Räjıpa Jesús lojreni:

—Rusa'ntu xtıdx Dios te rısanäjtu recostumbr xtentı. <sup>10</sup>Sa'csi räjıp Moısés: “Huinälajz xtadlu con xnanlu.” Räjıpanı: “Sıju'tıpacıtu nani gudzubde yejc xtadni o yejc xnanni.”

<sup>11</sup>Niluxh la'tu rniıtu sıajc gäb bejn loj xtadni o loj xnanni: “Dına gapä xhi cojn gacnäälı” (nani säloj, abadedä

guira'ti loj Dios). <sup>12</sup>La'tu ditu gusaan gunru bejn por xtadni nicla por xnanni. <sup>13</sup>Si'c rbälaztu xtidx Dios, te sasanäjtu recostumbr nani ruluiitu, luxh xhidajl cos sa' dee rujntu.

<sup>14</sup>Gurejdx Jesús guiraa rebejn, dxejc räjpni loj guiraareni:

—Colcuadiajg, colyacbee xtidxä.

<sup>15</sup>Rexhicos yälrajw ni rajw bejn, dini gunijt bejnga, rediidx ni rii nen lastoo bejn, näjza recos ni rujn bejn, ni'c runijt bejnga. <sup>16</sup>Pal yu' chu rrajz guiseed, sucuadiajg.

<sup>17</sup>Dxejcti gula'reni loj rebenxhidaal, biu'reni nen yu'. Dxejc gunabdiidx rexpejnpacni loj Jesús xhi säloj cuent ni guniini.

<sup>18</sup>Basejc Jesús diidx lojreni, räjpni: —¿La näjza la'tu xheti xcäriejntu?

¿La di'tu gacbee xhitis yälrajw nani riu' nen bejn digacdi gunijtni lastoo bejn, ä? <sup>19</sup>Sa'csi dini jiu' nen lastooni; riu'ni xque'ni, rdejdtini.

Si'c guniini te baluiini guira'ti xhicos najc naya. <sup>20</sup>Dxejc räjpni:

—Rediidx ni rii nen lastoo bejn, näjza recos ni rujn bejn, ni'c sii runijt lastoo bejn. <sup>21</sup>Sa'csi nen lastoo rebejn rii rexhigabgujdx, näjza yälresnä j chää sa'ni, yälresnä j ni xhet najcdi chäälni, yälrgu't sa'ni, <sup>22</sup>yälgubaan, yälrlajzni ga'pni xhixhten bejn, yällatsiaj, yälrusgueeni, yäl xheti xtujj lojni, yälrdxechlajz, yälrudzubde sa'ni, yälneyechlajzni, yälguyalajz. <sup>23</sup>Guiraa reyällatsiajre nen lastoo bejn riireni, luxh reni'csi runijt bejn.

**Tej guna Sirofenicia ni bililajz xtidx**

**Jesús**

(Mt. 15:21-28)

<sup>24</sup>Dxejc biriini ro'c, sääni nez guedx Tiro näjza nez Sidón. Ro'c

bia'nni nen te yu' sa'csi di rrajzni niacbee rebejn caro yu'ni, niluxh di niajcdi niuxhiga'tztisni. <sup>25</sup>Biengajc diajg te gunaa ro'c yu' Jesús.

Xindxape' gunaaga yu' bendxab nen lastooni. Bidzujn gunaaga, bazuxhijbni lo Jesús. <sup>26</sup>Gunaaga rnii griegw, najcni bejn Sirofenicia. Gunabni lojni guinibeeni guirii bendxabga nen lastoo xi'nni.

<sup>27</sup>Dxejc räjp Jesús lojni:

—Basaan gauxgaa rebiuux, sa'csi xhet laati gudzucajni xcuxtiil rebiuux te gudeednini loj rebä'cw.

<sup>28</sup>Dxejc gunii gunaaga, räjpni loj Jesús:

—Yo, Dad. Näjza rebäcue' ni suga' nen mex rajw nani rtejb ro' rebiuux.

<sup>29</sup>Dxejcti räjp Jesús lojni:

—Laaca rniliilu. Huij rolizlu.

Abirii bendxab nen lastoo xindxape'lu.

<sup>30</sup>Luxh che bidzujn gunaare rolizjni, a dxape' naga' lo da'. Gucbegajc gunaaga abirii bendxab nen lastoo dxape'ga.

**Basiajc Jesús te bengop**

<sup>31</sup>Dxejcru birii Jesús stehuält lo rexyuj guedx Tiro, gudejdni nez Sidón näjza rexyuj Decápolis. Bidzujntini ro' nis xten Galilee.

<sup>32</sup>Biädnä gaii bejn te niguii ni nacua't diajg ni lo Jesús. Digacdiza guinisa'c niguiiga. Biäd nabreni lo Jesús nusujni naani yejc niguiiga.

<sup>33</sup>Dxejcti badzucajnini loj rebejn. Baquitzgajcni rebicuenaani nen diajg ni, dxejcru batiobxhejn ni, gudajntini lujdxni. <sup>34</sup>Bahuiini xhaguibaa, bazaa lajzni, dxejc räjpni:

—iEfata! —nani säloj bixal.

<sup>35</sup>Dxejcrú bixalgajc rediajgni, gubangajc lujdxni, gunisa'cni.  
<sup>36</sup>Dxejcti gunibee Jesús rutlojdi gäbreni, per che räjpni lojreni si'c, laareni batie'chrureni diidxga.  
<sup>37</sup>Rdxeloduxhrene, räjpreni:  
 —Guira'ti laaca rujnni; ruxhalni diajg rediagcua't, luxh rusniini regop.

### Bayaan Jesús tajp mil bejn

(Mt. 15:32-39)

**8** Nen redxejga bidojp xhidalro bejn, luxh xheti xhigauureni. Dxejc gurejdx Jesús rexpejnpacni ni rinajlni, räjpni lojreni:

<sup>2</sup>—Rulazlazä rebejnre, sa'csi naj rajc chon dxej tre'reni loä, luxh xhet yu'di gauureni. <sup>3</sup>Niluxh palga guxhaläreni rolijzreni, xliajzreni, sidxajgreni lo nejz; sa'csi yu' renani zijtru siäädreni.

<sup>4</sup>Dxejcrú räjp rexpejnpacni lojni:  
 —¿Caro chaca'nu yätxtiil te cha xque! rebejnre ree, cadro rut rbäjzdi?

<sup>5</sup>Sas gunabdiidx Jesús lojreni:

—¿Bal yätxtiil rajptu?

Dxejcrú räjpreni:

—Gajdztsini.

<sup>6</sup>Gunibee Jesús gurej rebenxhidaalga loj yuj. Sas cua'ni guigajdx yätxtiilga, badeedni xquixhtios lo Dios, gula'ni reyätxtiilga. Dxejc badeednini loj rexpejnpacni te guteedrenini loj rebenxhidaal. Bateedtireni yätxtiilga lo rebenxhidaalga.  
<sup>7</sup>Rajpzareni gaii bälbäz, dxejcti badesac Jesús xquixhtios lo Dios, gunibeeni bateedzareni rebälbäzre loj rebenxhidaalga. <sup>8</sup>Dxejc gudajwreni, gudxaj xque'reni. Dxejc

batojp rexpejnpac Jesús gajdz dxijm reyätxtiil näj rebäjł dxuc ni bia'n. <sup>9</sup>Niluxh renani gudajwga najcreni si'cti tajp mil bejn. Dxejcti basadiidxnireni. <sup>10</sup>Biunägajc Jesús rexpejnpacni nen canuu, biäädreni nez Dalmanuta.

### Gunab refarisee te senro loj Jesús

(Mt. 16:1-4; Lc. 12:54-56)

<sup>11</sup>Biääd refarisee, renani najc rebenguidoo loj guedx Israel, guslojreni cayeinäjreni Jesús. Canabreni gunni te senro nani Diostis ni yu' guibaa sajc gun. Cagula'tzsireni, don xhi gunni.  
<sup>12</sup>Dxejcti bazaa lajz Jesús nen lastooni, räjpni:

—¿Xhicuent rlaiz rebejn ni nabajn naj fii gac resenro xten Dios? Rniliäpac lojtu, di rebejn ni nabajn naj fii nicla tej sen xhaguibaali.

<sup>13</sup>Dxejcti basa'nnireni ro'c, biusacni nen canuu, sä'tini stelaad nisga.

### Levaduor xten refarisee

(Mt. 16:5-12)

<sup>14</sup>Biallajzreni nica'reni yätxtiil, luxh xhetliidi sanädireni. Tejts yätxtiil nuureni nen canuu. <sup>15</sup>Cagulijdx Jesús rexpejnpacni, räjpni lojreni:  
 —Colsusin, colnati levaduor xten refarisee, colnatiza levaduor xten Herodes. (Nalajznu, xtiidxreni najc si'c levaduor.)

<sup>16</sup>Dxejcti cayeinäj sa'reni diidx xcuent nani gunii Jesús lojreni, dxejc räjpreni:

—Sa'csi dinu jia'p yätxtiil, ni'c rniini scree.

<sup>17</sup>Che gucbee Jesús xhini'c caniireni, räjpni:

—¿Xhicuent rniitu: “Sa'csi dinu jia'p yätxtiil”? ¿La gajdtu fii, la gajdtu gacbee? ¿La laltis nacnajd lastootu? <sup>18</sup> ¿La yu' balojtu, luxh ditu fii? ¿La sojb diajgtu luxh di diajgtu jiejn? ¿La dilajztu guizaj? <sup>19</sup> Che guḷa'a guigaii yätxtiil te gudajw gaii mil niguii, ¿bal dxijm yätxtil biujy batojptu?

Sas räjpreni lojni:

—Tzubitio'pni.

<sup>20</sup>—Che guḷa'a guigajdz yätxtiil te gudajw tajp mil bejn, ¿bal dxijm yätxtil biujy batojptu?

Sas räjpreni:

—Gajdzni.

<sup>21</sup>Dxejc räjpni lojreni:

—¿La gajdtu gacbesa'c xhi benä?

#### Basiajc Jesús te lotiä'p Betsaida

<sup>22</sup>Bidzunnäj Jesús rexpejn'pacni guedx Betsaida. Dxejc biädnäreni te lotiä'p loj Jesús, gunabreni loj Jesús caanni bejnga. <sup>23</sup>Dxejc gunaazni naa lotiä'pga, guläänini nen guejdx. Che batiobxhejnini nen rebalojni, basugajcni naani yejc baloj lotiä'pga, gunabdidxgajc Jesús:

—¿La yu' xhi rhuiilu, ä?

<sup>24</sup>Luxh che bahuii bejnga räjpni:

—Rhuiä sasaj rebejn, luxh si'c yajg rhuiä lojreni.

<sup>25</sup>Basusac Jesús naani yejc rebaloj bejnga. Dxejc bejn Jesús bahuii bejnga. Biajctini, zijtru gujc bahuisa'cni lo guiraa rebejn. <sup>26</sup>Dxejcti baxhaḷ Jesúsni rolizjni, räjpni:

—Basquejn, huijga rolizlu, na'c jiu'lu nen guejdx, na'c gäblu xhi gujclu lo rebejn ni yu' nen guejdx.

#### Basule' Pedr Jesús najc Crist

(Mt. 16:13-20; Lc. 9:18-21)

<sup>27</sup>Birinäj Jesús rexpejn'pacni lo reguejdx ni ria'n nez Cesarea xten Filipino. Laḷni sasajreni lo nejz räjp Jesús loj rexpejn'pacni:

—¿Chuni'c rnii rebejn nacä narä?

<sup>28</sup>Sas räjpreni lojni:

—Yu'reni rnii najclu Juan ni batiobnis, yu'zareni rnii najclu Elías, yu'zareni rnii najclu te rebejn ni gunii xtidx Dios.

<sup>29</sup>Dxejc räjpni lojreni:

—¿La'tu a'? ¿Chuni'c rniitu nacä narä?

Dxejc bazejc Pedr diidx, räjpni lojni:

—Luj najclu Crist.

<sup>30</sup>Dxejcti räjp Jesús lojreni:

—Rutlojdi gäbtu chu nacä.

#### Gunii Jesús xho guetni

(Mt. 16:21-28; Lc. 9:22-27)

<sup>31</sup>Dxejcti gusloj Jesús caguluiini rexpejn'pacni, räjpni:

—Narä nacä Xi'n Dios, ni gujc Niguii. Nanabpac tedä trabajwduxh. Sibälaz rebengool ni najc guxhtis nen guedx Israel narä, näjza renani rnibee loj rebixhojz, näjza rebejn ni ruluu leii: sugu'treni narä, luxh ni riojn dxej guibansacä lo rebengut.

<sup>32</sup>Guyasi guniini rediidxre. Sas huinä Pedr Jesús telaad, dxejc räjpni loj Jesús:

—Na'c guiniilu si'c.

<sup>33</sup>Dxejc batzuré loj Jesús, bahuiini loj rexpejn'pacni. Dxejc gudilnäjni Pedr räjpni:

—Gubicaj loä, Satanás, luj dilu gun xhigab xten Dios, xhigab ni rujn rebejntis rujnlu.



<sup>34</sup>Dxejc gurejdxni rebenxhidaal con reni najc xpejn<sub>pacni</sub>, räj<sub>pni</sub> lojreni:

—Palga yu' chu r<sub>lajz</sub> gac xpe<sub>näpac</sub>, sucuääz gunni ni rsia' lajz<sub>ni</sub> gunni, sutedni trabajw si'c tej ni caj lo crujz, sujiäd<sub>najlni</sub> narä. <sup>35</sup>Sa'csi nani r<sub>lajz</sub> gus<sub>laa</sub> xcäl<sub>nabaj<sub>nni</sub></sub>, sunij<sub>t<sub>ni</sub></sub> xcäl<sub>nabaj<sub>nni</sub></sub>. Luxh nani runij<sub>t</sub> xcäl<sub>nabaj<sub>nni</sub></sub> xcäl<sub>nasa'c</sub> narä, xcäl<sub>nasa'c</sub> x<sub>tidxä</sub>, siliaapac xcäl<sub>nabaj<sub>nni</sub></sub>. <sup>36</sup>Xlia' ga'p bejn guiraloj lo guedxliujre palga nitni lo Dios par tejpas. <sup>37</sup>Xhet gacdi gudeed bejn te guib<sub>annä</sub>j<sub>ni</sub> Dios. <sup>38</sup>Nani guituinäj narä con rextidxä naj, cheni najc rebejn be<sub>noj</sub>l, narä, Xi'n Dios nani gujc Niguii, situinä<sub>azani</sub> che jiäd<sub>nä</sub> reangl xten Dios che jiälää lo xcäl<sub>rdimbicha'</sub> X<sub>tadä</sub>.

**9** Dxejc räj<sub>p</sub> Jesús lojreni: —Rniliä<sub>pac</sub> loj<sub>tu</sub>, yu'reni suga' ree nani di guet fixgaareni abiääd xcäl<sub>rnibee</sub> Dios.

### Gubixhlo Jesús garenca

(Mt. 17:1-13; Lc. 9:28-36)

<sup>2</sup>Che gudejd xho'p dxej, Jesús cua' Pedr, näj Jacoob, näjza Juan, laatisreni huinäni yejc te danro. Ro'c gubixhlojni garenca lojreni.

<sup>3</sup>Gusloj rdimbicha' rexh<sub>ajbni</sub>, gujc xh<sub>ajbni</sub> nolbäj. Rut rajcti rusquijtz lajd lo guedxliujre si'c biquijtz xh<sub>ajbni</sub>. <sup>4</sup>Dxejc baluiiloj Elías näjza Moisés lojreni, cayuinäjreni Jesús diid<sub>x</sub>. <sup>5</sup>Sas räj<sub>p</sub> Pedr loj Jesús:

—Dad, laaca dxunnu ree. Naj jiennu cho<sub>n</sub> yuguixa', tejni xtenlu, steeni xten Moisés, steeni xten Elías.

<sup>6</sup>Si'c guniini sa'csi nicla niacbeeni xhini'c guiniini, sa'csi

cadxebduxh<sub>reni</sub>. <sup>7</sup>Dxejc biääd te za bejn balaa yej<sub>reni</sub>. Ne<sub>n</sub> zaga biejn xse' te ni räj<sub>p</sub>:

—Dee najc xi'nä nani sanälazä, colcuadi<sub>ajg</sub> x<sub>tidxni</sub>.

<sup>8</sup>Che batzuré lojreni, bahuiireni rutru suganäjti Jesús, xtebtis Jesús suga'.

<sup>9</sup>Che siädjiäj<sub>treni</sub> dajnga, gunibee Jesús rut lojdi guiniireni xcu<sub>ent</sub> ni bahuiireni, guiba<sub>n</sub>xgaasi Xi'n Dios nani gujc Niguii lo rebengut.

<sup>10</sup>Basälcheereni rediidxre ne<sub>n</sub> lastooreni. Dxej<sub>cru</sub> canabdiid<sub>x</sub> lo sa'reni xhicha säloj guiba<sub>n</sub>sacni lo rebengut. <sup>11</sup>Sas gunabdiidxreni lojni, räj<sub>preni</sub>:

—¿Xhicuent rnii remastr xten leii naquiin<sub>pac</sub> jiädx<sub>gaa</sub> Elías?

<sup>12</sup>Dxejcti bazej<sub>cni</sub> diid<sub>x</sub> lojreni, räj<sub>pni</sub>:

—Guliireni siädxgaapac Elías, luxh sunsa'cni guira'ti xhi cos. Naj a', ¿xhicuent caj lo guijtz xcu<sub>ent</sub> Xi'n Dios ni gujc Niguii, sidej<sub>dni</sub> trabajwduxh, rutza jiudini? <sup>13</sup>Luxh narä rniä loj<sub>tu</sub>, abiääd Elías, luxh bennäjreni si'ctis ni r<sub>lajz</sub>reni, si'cpac ni caj loj guijtz ni rusule' xcu<sub>entni</sub>.

### Basiajc Jesús te biuux ni guyu' be<sub>nd</sub>xab ne<sub>n</sub> lastooni

(Mt. 17:14-21; Lc. 9:37-43)

<sup>14</sup>Che asiädreni cadre tre' sgaii rexpejn<sub>pac</sub> Jesús, bahuiireni loj xhidalro bejn ni tre' lojreni, luxh cayeinä<sub>j</sub> rebejn ni rulu<sub>ii</sub> leiireni.

<sup>15</sup>Che bahuii guiraa rebejn loj Jesús, bidxeloduxh<sub>reni</sub>, baxun<sub>reni</sub>, huiye'tzreni xchan lojni. <sup>16</sup>Dxejc gunabdiid<sub>x</sub> Jesús lojreni:

—¿Xhini'c rusieinäj<sub>tu</sub> laareni?

<sup>17</sup>Sas gunii tej reni yu' lo be<sub>n</sub>xhidaalga, räjpni:

—Dad, ree siädnaá xi'nä lojlu, yu' be<sub>n</sub>dxab ne<sub>n</sub> lastooni, nani rujn najcni gop. <sup>18</sup>Cheni rniaaznini, rutienta'ni xi'nä, luxh ri<sub>d</sub>uxh bitzun ro'ni, näjza rauya'ni ro'ni, luxh cabijdzni. Aräpä loj re<sub>x</sub>pej<sub>n</sub>pac<sub>l</sub>u cuääreni be<sub>n</sub>dxabga, niluxh di niajcdi nibäärenini.

<sup>19</sup>Dxejcti gunii Jesús lojreni, räjpni:

—La'tu, be<sub>n</sub> ni di chalilajz, ¿gucli chu'ä lojtu te chalilajz<sub>t</sub>u? ¿Gucli gusieedtu narä? iCo<sub>l</sub>tanäni loa!

<sup>20</sup>Dxejc biädna<sub>r</sub>eni biuuxga lojni. Che bahuii be<sub>n</sub>dxab lo Jesús, basnijni bi'nga, basälta'tinini lo yuj. Sädiid<sub>x</sub>ni, luxh ca<sub>r</sub>ii bitzun ro'ni.

<sup>21</sup>Gunabdiid<sub>x</sub> Jesús loj xtadni:

—¿Gucli rajcni si'c?

Dxejc räjp dade'ga:

—Che gujclini biuxbáz. <sup>22</sup>Balti huält rusä<sub>l</sub>nini lo guiboo näjza lo nis te ju'tnini. Palga yu' xhi gac gunlu, balazlajz nuunu, gucnä<sub>j</sub> nuunu.

<sup>23</sup>Sas räjp Jesús lojni:

—¿Xhicuent rniabdiid<sub>x</sub>lu la sajc gacnäálu? Xhitis sajc gac par nani rililajz.

<sup>24</sup>Guredxa' xtad bi'nga, räjpni:

—iRililazä! Gucnä<sub>j</sub> narä te chaliiru lazä.

<sup>25</sup>Che bahuii Jesús bixa't xhidajl be<sub>n</sub> lojni, gudidxa'ni lo be<sub>n</sub>dxabga räjpni lojni:

—Be<sub>n</sub>dxab ni rujn gop, narä canibeä, birii ne<sub>n</sub> lastoo bi'nga. Na'cru chulu ne<sub>n</sub> lastooni.

<sup>26</sup>Dxejcru guredxa' be<sub>n</sub>dxabga, luxh basnibzejsni bi'nga, dxejcru biriini ne<sub>n</sub> lastooni. Astoo te

be<sub>n</sub>gut bia'n bi'nga ro'c. Xhidajl rebe<sub>n</sub> räjp:

—Agujt<sub>n</sub>i.

<sup>27</sup>Dxejc gunaaz Jesús ñaa bi'nga guläsnini. Guzuliiti bi'nga. <sup>28</sup>Dxejcti che abiu' Jesús ne<sub>n</sub> yu', gunabdiid<sub>x</sub> re<sub>x</sub>pej<sub>n</sub>pac<sub>n</sub>i lojni:

—¿Xhicuent di niajcdi nibäänu be<sub>n</sub>dxabga?

<sup>29</sup>Dxejc räjp Jesús lojreni:

—Di gacdi cuäätu sa' be<sub>n</sub>dxabre palga ditu cued<sub>x</sub>-guinab lo Dios, palga ditu gucua<sub>n</sub>xgaa.

### Gunisac Jesús xho guetni

(Mt. 17:22-23; Lc. 9:43-45)

<sup>30</sup>Dxejc biriireni ro'c, gudejdreni Galilee. Luxh di rlajz Jesús niacbee rebe<sub>n</sub> sadejdreni nejzga, <sup>31</sup>sa'csi caguluini re<sub>x</sub>pej<sub>n</sub>pac<sub>n</sub>i. Cayäjpni lojreni: “Xi'n Dios ni gujc Niguui sidejdni ladz<sub>n</sub>aa rebe<sub>n</sub>, niluxh sugu'trenini. Che guiza' cho<sub>n</sub> dxej gujt<sub>n</sub>i, sibaj<sub>n</sub>ni stehuält.” <sup>32</sup>Niluxh laareni direni niacbee xhini'c guniini, bidxej<sub>b</sub>zareni niniabdiid<sub>x</sub>reni lojni.

### ¿Chuni'c saj<sub>c</sub>ru?

(Mt. 18:1-5; Lc. 9:46-48)

<sup>33</sup>Bidzuj<sub>n</sub>tireni Capernaum. Che biu'ni ne<sub>n</sub> yu' räjpni lojreni:

—¿Xhini'c cagusiey<sub>t</sub>u lo nejz?

<sup>34</sup>Dxejc xhet guniitireni, sa'csi laareni cagusieinäj sa'reni lo nejz don chuni'c saj<sub>c</sub>ru lojreni. <sup>35</sup>Sas gurej Jesús, dxejc gurej<sub>d</sub>xni guitzubitio'p xpej<sub>n</sub>pac<sub>n</sub>i, räjpni lojreni:

—Palga yu' chu rlajz gasaj<sub>c</sub>ru lojtu, sugacxgaani si'c te nani xhet saj<sub>c</sub>t<sub>i</sub>, sugunzani xtzuun chutis.

<sup>36</sup>Dxejcti cua'ni tej biuxbáz, huinänini galäiireni. Dxejc gudääz<sub>n</sub>i biuxbázga, räjpni lojreni:

<sup>37</sup>—Chutis ni gacnäj te rebiuxe're sa'csi rinälajzni narä, sacnäjni narä, luxh nani gacnäj narä, xhet narätis gacnäjntini, näjza xtaďä nani baxhal narä racnäjni.

**Nani di guiniyaj nuunu, xladnu yu'ni**

(Lc. 9:49-50; Mt.10 :42)

<sup>38</sup>Dxejcti gunii Juan räjpni lojni:

—Bahuiinu lo te bejn ni rbää bendxab con xcälrnibee lajlu, niluxh dini sanäj nuunu. Sas huiye'tznu lojni na'c gunni si'c sa'csi dini sanäj nuunu.

<sup>39</sup>Dxejc räjp Jesús lojni:

—Na'c gudxojntu gunni si'c sa'csi bejn nani rujn milagwr con xcälrnibee laä digacdi guiniyagajcni narä. <sup>40</sup>Nani di guidxagdijl nuunu, xlaadnu yu'ni. <sup>41</sup>Rniliäpac lojtu, chutis ni guniidx te bas nis lojtu sa'csi najctu xpejnpac Crist, siguijx Diosni xcuent nani bejnni.

**Nani rujn jiajb bejn lo dojl**

(Mt. 18:6-9; Lc. 17:1-2)

<sup>42</sup>'Chutis ni gusiu' tej rebiuxe' ni rililajz narä nen dojl, sugal te guimolin yejnni dxejcti gucuaarenini lo nisdoo. <sup>43</sup>Palga tej naalu gun gunlu dojl, batiu'ni: hueenru natiujnglu chaläjzlu cadro yu' Dios quela sojb guiro'p naalu gusalreni luj gabijl, loj bajl ni di jiuui, <sup>44</sup>cadro diza xpisiujgreni guet, diza bajl jiuui. <sup>45</sup>Luxh palga tej ni'lu gun gunlu dojl, batiu'ni: hueenru nitiujnglu chaläjzlu cadro yu' Dios quela sojb guiro'p ni'lu luxh chäalu gabijl, lo bajl ni di jiuui, <sup>46</sup>cadro di xpisiujgreni guet, diza bajl jiuui. <sup>47</sup>Luxh palga tej balojlu gun gunlu dojl, gulääni: hueenru chäalu cadro

rnibee Dios natiä'p lojlu quela sojb guiro'p balojlu chäalu gabijl, <sup>48</sup>cadro di xpisiujgreni guet, diza bajl jiuui.

<sup>49</sup>'Si'cni rloj sejd yejc xhi cos yälrajw, si'cza guiloj bajl yejc guiraareni. Guilojza sejd lo guira'ti ni rdeed bejn lo Dios. <sup>50</sup>Hueen najc sejd, luxh palga agudejd yäl'nadzij yejcni, čxho guntu te gacsacni nadzij? Colyajc nadzij la'tu, colguibannäsa'c sa'tu.

**Baluu Jesús xcuent rälu'ro'n sa'ni**

(Mt. 19:1-12; Lc. 16:18)

**10** Dxejcru birii Jesús ro'c huijni nez Judea näjza nez ro' gueu Jordán stelaad. Ro'c bidojpxhidajl bejn lojni stehuält, sas guslosacni caguluiinireni si'ctis ni ruluiinireni. <sup>2</sup>Sas refarisee, renani najc rebenguidoo loj guedx Israel, gubigreni loj Jesús, cagula'tzreni Jesús. Ni'c gunabdiidxreni, räjpreni: —čLa laaca gun niguii gusaan chäälni, ä?

<sup>3</sup>Dxejc laani bazejcni diidx, räjpni lojreni:

—čXhini'c gunibee Moisés guntu?

<sup>4</sup>Dxejcru räjpreni:

—Moisés basaan gudeedni te guitz gusaan chäälni che guro'ninni.

<sup>5</sup>Dxejc Jesús räjp lojreni:

—Sa'csi guyaa lajztu, ni'cni bacuaa Moisés diidxga lojtu. <sup>6</sup>Niluxh che birixtiej ben guedxliuj, “niguii con gunaa benchee Diosreni.” <sup>7</sup>“Ni'cni te niguii siriini loj xtaďni, loj xnanni te cuäznäjni chäälni. <sup>8</sup>Niluxh renani gujc tiop bejn sajcreni si'c tejsi bejn”, dirureni gac tiop bejn, si'c tejsi bejn gacreni. <sup>9</sup>Na'c gudzucaj bejn lo sa bejnni nani abachaag Dios lo sa'ni.

<sup>10</sup>Che biu'reni neñ yu' gunabdidxsac rexpejn̄pacni lojni xcuent rediidxre. <sup>11</sup>Dxejc räjpni lojreni:

—Chutis niguii ni gusaan cháäl̄ni, sas guchñaani ste'cani, rujnni dojl̄. <sup>12</sup>Niluxh palga gunaa guro'n cháäl̄ni sas guchñaani ste'ca niguii, rujnzani dojl̄.

**Gunab Jesús gunle' Dios yejc rebiuxbáz**

(Mt. 19:13-15; Lc. 18:15-17)

<sup>13</sup>Biäd̄nāza rebejn̄ biuxbáz lojni te gutzuub Jesús ñaani yejcreni, sas gudidxa' rexpejn̄pacni lojreni.

<sup>14</sup>Che bahuii Jesús xhi cayujn̄ rexpejn̄pacni, bidxe'chni räjpni lojreni:

—Colsaan jiäd̄ rebiuxbáz loä. Na'c gudxojntureni, sa'csi xcäl̄rnibee Dios najc xten reni najc nadolajz si'c najc biuxbáz.

<sup>15</sup>Rniliäpac lojtu, chutis ni rlajz jiu' lo xcäl̄rnibee Dios nanab guzobdiajgreni xtidx Dios si'c ruzobdiajg rebiuxe' xtidx xtadreni. Palga dini gun si'c, dini jiu' lo xcäl̄rnibee Dios.

<sup>16</sup>Dxejcti gudääz Jesús rebiuxbáz, bazujzani ñaani yejcreni, gunab Jesús gunle' Dios yejcreni.

**Te bi'n ni rapduxh guninäj Jesús**

(Mt. 19:16-30; Lc. 18:18-30)

<sup>17</sup>Che birii Jesús loj xnejzni, rurux̄ te niguii biäd̄ lojni, bazuxhijbni. Dxejcti gunabdiidx niguiiga lojni räjpni:

—Dad, bensa'c, ¿xhini'c gunä te xca'ä yäl̄nabajn̄ par tejpas?

<sup>18</sup>Sas räjp Jesús lojni:

—¿Xhicuent rniilu loä bensa'c? Tejtisni najc bensa'c; Diostis najc bensa'c. <sup>19</sup>Najnlu xhini'c gunibee Dios gunni: “Na'c guesnäjl̄u cháäl̄ sa'lu, na'c ju'tlu, na'c cuanlu, na'c gusgueelu chutis, na'c cuääl̄u yejc xhixten sa'lu, huinälajz xtadlu, xnanlu.”

<sup>20</sup>Dxejc räjp niguiiga lojni:

—Dad, guiraa redee cayunä cheni gucäl̄i bi'n.

<sup>21</sup>Che bahuii Jesús lojni, huinälajznini, räjpni lojni:

—Tejtis nani cayääd̄x gunlu. Huij, huito' guiraa xhixtenlu, badeed xcuentni loj rebejn̄ nani diga'p, dxejcti guniidx Dios xhidajl̄ xhi ga'plu xhaguibaa. Gudanajl̄ narä, mase tedlu trabajw.

<sup>22</sup>Dxejc che biejn̄ diajgni diidxre, guc-huin lajzni, xhet laadi yu'ni siini, sa'csi naclenduxh xhixtenni yu'.

<sup>23</sup>Dxejc bahuii Jesús guideb gabi lojreni, räjpni loj rexpejn̄pacni: —Naganduxh jiu' rebejn̄ nani yu'duxh xhixtenni lo xcäl̄rnibee Dios.

<sup>24</sup>Dxejc bidxelo rexpejn̄pacni che biejn̄ diajgreni rextiidxni. Dxejc räjp Jesús lojreni stehuält:

—iAitu xi'nä!, lacti naganduxh gusaan renani sanälajz xhixtenni gunibee Diosreni. <sup>25</sup>Guyasiru ted te cameii ni' te guux quela gusaan te bejn̄ ni yuduxh xhixtenni gunibee Diosni.

<sup>26</sup>Dxejc bidxeloduxhreni, räjpreni lojni:

—¿Chuxhni'c sajc laa lo dojl̄?

<sup>27</sup>Dxejc bahuii Jesús lojreni, räjpni:

—Bejn digacdi guslaa sabejn̄ni,  
Dioſtis rajc ruſlaa bejn̄ lo dojl̄,  
sa'csi Dios rac rujn̄ guira'ti.

<sup>28</sup>Sas gusloj Pedr cayäjp lojni:

—Naj nuure ahuilälaznu guira'ti te  
siopnajl̄nu luj.

<sup>29</sup>Dxejc räjp Jesús:

—Rniliäpac lojtu, chutis  
nani cuälaz rolizni, rebejt̄zni,  
rebiaj̄jni, xtadni, xnanni,  
chääl̄ni, rexi'n̄ni, rexyuj̄ni,  
xcäl̄nasa'c narä, näjza xcäl̄nasa'c  
xtid̄x Dios, <sup>30</sup>sica'ni lo gued̄xliuj̄re  
te gayuu huält̄ xhidaj̄lr̄u. Sica'ni  
rolizni, rebejt̄zni, rebiaj̄jni,  
xnanni, rexi'n̄ni, rexyuj̄ni.  
Sisiunaj̄lrenini naj, dxejc  
xhaguibaa sica'ni yäl̄nabaj̄n par  
tejpas. <sup>31</sup>Xhidaj̄l rebejn̄ nani sajc  
lo gued̄xliuj̄re xhet sajc̄direni  
xhaguibaa; niluxh rebejn̄ nani xhet  
sajc̄di lo gued̄xliuj̄re, xhaguibaaru  
gasaj̄creni.

### **Gunisac Jesús diid̄x xho guetni**

(Mt. 20:17-19; Lc. 18:31-34)

<sup>32</sup>Dxejcru sasaj Jesús, nijd̄ni lo  
rexpejn̄pacni sääreni Jerusalén,  
luxh cadxeloj̄reni. Cadxebza rebejn̄  
nani sanaj̄lreni. Dxejcti gul̄šac  
Jesús rexpejn̄pacni lo rebejn̄, gusloj  
cayäjp̄ni loj̄reni guira'ti nani sacni.

<sup>33</sup>Räjp Jesús:

—Sionnu Jerusalén, luxh narä,  
Xi'n Dios nani gujc Niguii, sidedä  
ladz̄naa rebixhoj̄z nani rnibee  
näjza rebejn̄ ni ruluii leii. Luxh  
sinibeereni guetä. Suteedreni narä  
lo reben̄z̄ij̄t nani digac xpejn̄ Israel.  
<sup>34</sup>Suxhisnäj̄reni narä, siguijn̄reni  
narä, sutiobxhejn̄zaren̄i loä, dxejcru  
sugut̄treni narä. Che riojn̄ dxej  
sibaṅsacä.

### **Gunab Jacob näjza Juan te yäl̄nasa'c**

(Mt. 20:20-28)

<sup>35</sup>Dxejcti gubig Jacob näjza Juan,  
rexi'n̄ Zebedeo, räjp̄reni lojni:

—Dad, rlaaznu gunlaalu nani  
guiniabnu lojlu.

<sup>36</sup>Dxejc räjp Jesús loj̄reni:

—¿Xhini'c r̄laj̄ztu gunä xcuent  
la'tu?

<sup>37</sup>Räjp̄reni:

—Cue tejnu cuä'lu ladbee, xteenu  
cue cuä'lu ladbäj̄gw che acanibeelu.

<sup>38</sup>Dxejc räjp Jesús loj̄reni:

—Ditu gan xhini'c r̄niabtu. ¿Xhixh  
sajc yätu nani yä'ä? ¿Xhixh sajca  
guirobnistu si'cni guirobnisä?  
Nalaj̄znu, xhixh sajc tedtu trabaj̄w  
nani tedä narä.

<sup>39</sup>Sas räjp̄reni lojni:

—Sajc tednuni.

Dxejc räjp Jesús loj̄reni:

—Guliini sajc yätu nani yä'ä, luxh  
guirobnistu si'cni guirobnisä narä.

<sup>40</sup>Te cue tejtu ladbee xtenä steetu  
cue xladbägwä, xhet xtenä dini te  
gunidxäni. Rebejn̄ nani agule Dios,  
reni'c cue xladbeä, xladbägwä.

<sup>41</sup>Luxh che biejn̄ diaj̄g stzuureni  
bidxe'chreni loj̄ Jacob näjza loj̄  
Juan. <sup>42</sup>Sas gurej̄dx Jesúsreni,  
räjp̄ni loj̄reni:

—La'tu najntu renani rnibee lo  
rebejn̄ nani digac xpejn̄ Israel,  
rdxaḡlaj̄z gasaj̄crueni lo rebejn̄.  
Luxh rebejn̄ ni saj̄c rnibeduxh̄reni  
lo rebejn̄. <sup>43</sup>Xhet si'c̄di guntu la'tu.  
Chutis nani r̄laj̄z gasaj̄cru lojtu,  
riäj̄l̄ gacni mos lojtu. <sup>44</sup>Luxh chutis  
la'tu nani r̄laj̄z gasaj̄cru, riäj̄l̄ gacni  
xmos guiraatu. <sup>45</sup>Di Xi'n Dios  
ni gujc Niguii niäd, te ga'ptisni

mos, biäädzani te quiixni con xcäl'nabajñni te laa xhidajl bejn lo dojl.

**Basiajc Jesús Bartimeo, ni natiä'p lojni**

(Mt. 20:29-34; Lc. 18:35-43)

<sup>46</sup>Dxejcti biäädreni Jericó. Che birii Jesús ro' guedx Jericó con rexpeljñpacni nájza rebenxhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabääni gojn. <sup>47</sup>Che bejn diajgni laa Jesús ni siääd Nasare't ni sadejd ro'c, guslojni rbedxa'ni, räjpni:

—Jesús, xi'n David, balazlajz narä.

<sup>48</sup>Xhidajlreni gudidxa' lojni, te jiäuu ro'ni. Dxejc laani dipru rbedxa'ni räjpni:

—Xi'n David, balazlajz narä.

<sup>49</sup>Dxejc guzudxi Jesús, gunibegajcni gucrejdx niguiiga.

Gurejdxreni lotiä'pga, räjpreni lojni:

—Basutijp lajzlu, gusulii, luj cabejdxni.

<sup>50</sup>Sas ro'ca xhablajzni gudixhni, huisuliini, biäädtini lo Jesús.

<sup>51</sup>Dxejc räjp Jesús lojni:

—Naja', çxhini'c rlanjlu gunä?

Dxejc räjp lotiä'pga loj Jesús:

—Dad, rlazä gunlu fiä.

<sup>52</sup>Dxejcti räjp Jesús lojni:

—Huij, abiajclu sa'csi rililajzlu.

Lagajc dxejc gujc bahuiini.

Sanajltini Jesús lo nejz.

**Biu' Jesús Jerusalén**

(Mt. 21:1-11; Lc. 19:28-40; Jn.12 :12-19)

**11** Cheni sadzujñreni gajxh Jerusalén, gudejdreni nen reguedx Betfagé nájza nen guedx Betania nez cuä' dajne' ni laa dan

Oliib. Baxhal Jesús tiop xpejnñpacni, <sup>2</sup>räjpni lojreni:

—Colchäj guedxe' ni ria'n nez lojtu. Che guidzujñtu ro' guejdxga, sidxäلتu te bure' ni caduu. Gajd bejn cuibni. Colxhecní, coltanägajcni. <sup>3</sup>Palga yu' chu naa lojtu: “¿Xhicuent rujntu si'c?” Colye'tztis: “Dad caquiinni.” Dxejc suxhalgajcni bure'ga ree.

<sup>4</sup>Säätireni ro'c. Dxejru ronejz bidxälreni te bure' caduu ro' te lä'. Dxejcti baxhecrenini. <sup>5</sup>Gaii bejn ni tre' ro'c räjp lojreni:

—¿Xhicuent caguxhectuni?

<sup>6</sup>Dxejc räjpreni loj rebejnga si'cni räjp Jesús lojreni gäbreni. Basangajc rebejnga sanäreni bure'ga. <sup>7</sup>Dxejru biädñäreni bure'ga loj Jesús.

Badzuubreni xhablajzreni dejt bure'ga. Gubijbti Jesús bure'ga.

<sup>8</sup>Xhidajlza bejn gudixh xhablajzreni lo nezyuj, sgaiireni gudi'ch balajg lo reyajg te gudixhrenini lo nezyuj.

<sup>9</sup>Rebejn ni nijd lojni náj reni sanajl dejtzni guredxa'reni, räjpreni:

—iColguiliä'p xpala'nni! Coldeed xquixhtiooz loj Dios sa'csi baxhalni nani siääd xcuentni. <sup>10</sup>Coldeed xquixhtiooz loj Dios sa'csi agubiré xcäl'rnibee toxtadnu David.

iColguiliä'p xpala'n Dios ni yu' jiaro!

<sup>11</sup>Dxejcti biu' Jesús nen guedx Jerusalén. Biu'zani nen guidoro. Che bahuii Jesús guira'ti ni cayajc nenga, sanäni guitzubitio'p xpejnñpacni, sääreni Betania sa'csi agudxej.

**Batzubde Jesús yejc te yagiigw ni xhet cajdi lojni**

(Mt. 21:18-19)

<sup>12</sup>Che bara yääl, biunejzreni Betania. Dxejcti gusloj calaan Jesús,

<sup>13</sup>bahuiini zijt sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc. <sup>14</sup>Sas gunii Jesús räjpni loj yag iigwga: —Rutru gauudi ninejxh ni rcaj lojlu par tejpas.

Biejnza diajg rexpejnpacni.

### **Gulää Jesús renani ruto' näj renani rsii nen guidoo**

(Mt. 21:12-17; Lc. 19:45-48; Jn.2 :13-22)

<sup>15</sup>Dxejcti bidzujñreni guedx Jerusalén. Biu' Jesús nen guidoro. Gusloj cabääni renani ruto' näj renani rsii nen guideoga. Niluxh batiejxhni rexmex renani ruchaa meel, näjza reyagxhil xten renani ruto' paloom. <sup>16</sup>Diruni nusaan nidednäjnreni xhicos nez nen guideoga. <sup>17</sup>Dxejc caguluiinireni, räpgajcni lojnreni:

—¿La et screedi caj loj guiitz?

“Xyu'ä sirilaj yu' cadre rminab guiraa rebenguedxliuj lo Dios.” La'tu abejntuni si'c xpiliää gubaan.

<sup>18</sup>Rebixhojz ni rnibee näjza remastr xten leii biejn diajgreni nani gunii Jesús. Sas gudiilreni xho ju'trenini, sa'csi rdxejbreni Jesús, sa'csi guiraa rebejn rdxejoj rextidx Jesús. <sup>19</sup>Che biu' guxhijn, birii Jesús guejdxga.

### **Gubijdz yagiigw ni bidzubde**

(Mt. 21:20-22)

<sup>20</sup>Che bara yääl gudejdreni, bahuiireni agubijdz guideb yagiigw, näj rexlobaani. <sup>21</sup>Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejcnii, agubijdzni.

<sup>22</sup>Dxejcti gunii Jesús räjpni lojni: —Colchalilajz Dios. <sup>23</sup>Rniliápac lojtu, chutis nani gäb loj dajnre: “Gubicaj, bitejb loj nisdoo”, luxh dini guntio'p lajzni, chalilajztisni scree gac nani guniini, sajcpac nani guniini. <sup>24</sup>Ni'cni rniä lojtu, xhitis nani guiniabtu lo Dios che rninäjtni, colchalilajz xca'tuni, dxejc sica'tuni. <sup>25</sup>Luxh che guiniabtu Dios, palga yu' chu loj rdxechlajztu, colsiäjla lajztu, te näjza Xtadtu nani yu' xhaguibaa gusiäjla rextojltu. <sup>26</sup>Palga ditu gusiäjla lajztu con resa'tu, diza Xtadtu nani yu' xhaguibaa gusiäjla lajzni rextojltu.

### **Yälrnibee xten Jesús**

(Mt. 21:23-27; Lc. 20:1-8)

<sup>27</sup>Sas bidzunsacreni guedx Jerusalén. La' ni sasaj Jesús nen guidoro, rebixhojz nani rnibee, näjza rebejn ni ruluii leii, näjza reguxhtis gubig lojni. <sup>28</sup>Räjpreni lojni:

—¿Xhi yälrnibee rajplu, ni'c rujnlu redzuunre? ¿Chu baniidx yälrnibee rujnlu redzuunre?

<sup>29</sup>Dxejc räjp Jesús lojnreni:

—Guiniabdidxäza lojtu.

Coltzu'ni loä, dxejcti guiniäza xhi yälrnibeere rapä ni'c runä redzuunre. <sup>30</sup>¿Chu baxhal Juan ni batiobnis? ¿La Dios o la rebejn? Colnii loä naj.

<sup>31</sup>Dxejcti gunii loj sa'reni, räjpreni:

—Palga jie'tznu “Dios”, naani “¿xhicient ditu nililajz xtiidxni?”

<sup>32</sup>Diza niacti niäjbnreni “rebejn” sa'csi rdxejbreni rebenxhidaal, sa'csi guiraa rebejn huililajz Juan gujc te bejn ni guniipac xtidx Dios.

<sup>33</sup>Dxejcti guniireni, räjpreni loj Jesús:

—Dinu guidon.

Sas räjp Jesús lojreni:

—Dizana guiniä xhi yälrnibeere rapä runä redzuunre.

**Te xcuent rebenguixd ni rbäzlaa**

(Mt. 21:33-46; Lc. 20:9-19)

**12** Dxejcti gusloj caguseed Jesús rebejn con recuent ni ruluii, räjpni:

—Yu' te bejn bazuj yaguub loj xyujni, bejnzani bazaani, dxejcru gudäänni te lajt cadro jä't uubga. Dxejcti bejn ni te yu' jiaa, te ro'c cue nani ga'p lo xyujni.

'Badedlaatinini loj gaii bejn, sä'tini zijt. <sup>2</sup>Che bidzuj xpäii uub, baxhal baxhuaan uubga te xmosni loj rebejn ni rbäzlaa ro'c, te xca'ni uub nani riäjł xca' bejnga. <sup>3</sup>Dxejc rebejn ni rbäzlaa ro'c gunaazreni mosga, gudijnrenini, luxh bazejcrenini siini ganaxni.

<sup>4</sup>Dxejcru baxhal baxhuaanga stee mos lojreni. Niluxh laareni bacuaareni guijni, gudilguixdreni yejc mosga, xho rniajni gubi'ni. <sup>5</sup>Dxejc baxhal bejnga stee mos, dxejc bagu'trenini. Baxhalni xhidajlrurenini. Gaii gudilguixdreni, sgaiini bagu'treni.

<sup>6</sup>'Yu'za tejtis xi'nini, luxh sanälajznini. Por lult näjza xi'nini baxhalni, naani: "Siucarenini xi'nä."

<sup>7</sup>Dxejc rebejn nani rbäzlaa ro'c räjp loj sa'reni: "Dee najc laa ni jiannäj ree. Coltaa, guigu'tnuni, te xca'nu yujre." <sup>8</sup>Sas gunaazrenini, bagu'trenini. Guläätirenini lo yujga.

<sup>9</sup>'¿Xhicha gun baxhuaan yaguubga rebejnre? Siädni luxh sugu'tni rebejnre, dxejcti gudeedni yujga loj ste'ca bejn.

<sup>10</sup>'¿La gajdtu goł guijtz ni rnii scree?

Guij nani guläcaj renani

runchee yu',

ni'c aguyc mastr ni guzuj galoo.

<sup>11</sup>Dad xtenu bejn scree, cos sacduxhni nezlojnu.

<sup>12</sup>Dxejc rlajz reguxhtis nani bacuadijg cuentre niniaaz Jesús, sa'csi gubeereni laareni cacuaa Jesús diidxre. Sa'csi bidxejbreni rebexhidaal, ni'c basa'nrenini, sä'tireni.

**Diidx xcuent reimpuest**

(Mt. 22:15-22; Lc. 20:20-26)

<sup>13</sup>Dxejcti baxhalreni gaii xpejn refarisee näjza gaii xpejn Herodes loj Jesús te gula'tzreni don xho gac guiniaazreni Jesús. <sup>14</sup>Dxejcti biädreni, räjpreni lojni:

—Dad, nadonnu luj najclu te bejn ni rnii. Par luj guiraasi bejn sajc tebloj, sa'csi dilu fii la sajc bejn o la xhet sajc di bejn. Luj ruluiipaclu xhini'c rlajz Dios gun bejn. ¿La laaca quiix bejn reimpuest lo xcubieer César o la xhet laadi? ¿La guidiixnu o la dinu guidiix?

<sup>15</sup>Dxejcti laani gubegajcni rujnsireni si'cni rniabdiidxreni. Räjpni lojreni:

—¿Xhicuent runnäjtü narä scree? Coltanä te meelga loä, te fiä lojni.

<sup>16</sup>Badeednirenini te meel lojni, dxejc räjpni lojreni:

—¿Chu yejc caj lojni, chu laj caj lojni?

Dxejc räjpreni:

—Xten César.

<sup>17</sup>Dxejc räjp Jesús lojreni:

—Coldeed nani najc xten César loj César; coldeedza nani najc xten Dios loj Dios.



Baschelojni rebejn̄ga con xtiidxni.

**Yäl̄rniabdiidx xcuent yäl̄rbansacni lo rebengut**

(Mt. 22:23-33; Lc. 20:27-40)

<sup>18</sup>Sas biädhuii resaducee loj Jesús. Resaducee najc rebejn̄ nani rnii di rebengut guibansac. Dxejc gunabdiidxreni lojni, räjpreni:

<sup>19</sup>—Dad, xleii Moisés ruluii loonu, palga guet te niguii luxh gusa'n̄ni chäälni ruti xi'n̄ni, nanabpac xca' bejtzni chäälni, te chu xi'n̄ni con laani lacua niu' xi'n̄n tobejtzni.

<sup>20</sup>Guyu' gajdz niguii, bejtz najcreni. Sas cua' niguigalooa chäälni.

Che gujtni ruti xi'n̄ni. <sup>21</sup>Dxejcti

cua' ni rojpga gunaaga. Che gujtni, rut gajc̄di xi'n̄ni. Si'cza gusajc ni riojnga. <sup>22</sup>Si'cza guläznäj gunaaga guigajdzreni. Per nicla tej reni di xi'n̄reni niu'.

Dxejcti gujtz̄a gunaaga. <sup>23</sup>Guigajdzreni guläznäjreni gunaare. Cheni guibansacreni lo rebengut, ¿chu chäǟl gacni?

<sup>24</sup>Dxejc bazejc Jesús diidx lojreni, räjpni:

—Et laadi rniitu, sa'csi ditu gumbesa'c rextidx Dios nani bacuaa reniguii lo guijtz, dizatu gumbee yäl̄rnibee xten Dios. <sup>25</sup>Che guibansacreni loj rebengut, direni guch̄naa, rutza gudeed̄tiren̄i te guch̄naaren̄i. Niluxh sajcreni si'c najc rexangl Dios nani yu' xhaguibaa. <sup>26</sup>Palga canabdiidxtu la r̄bansac rebengut, ¿la di lajztu guisaj b̄ltu guijtz ni bacuaa Moisés? Moisés bacuaa nani gunii Dios lojni nen̄ bajl, räjpni: “Narä nacä Xtios Abraham, Xtios Isaac, Xtios Jacob.”

<sup>27</sup>Palga Dios najc Xtios rebejn̄re,

direni gac bengut, nabannäjreni Dios. Et laadi najc xhigabtu.

**Yäl̄rnibee ni sajrcu**

(Mt. 22:34-40)

<sup>28</sup>Dxejrcu bidzuj̄n tej rebejn̄ ni najn leii, biejn̄ diajgni xhi caniireni, biejn̄za diajgni laaca gunii Jesús lojreni.

Dxejcti gunabdiidxni loj Jesús:

—¿Xhi mandamient sajrcu lo guiraaren̄i?

<sup>29</sup>Dxejc räjp Jesús lojni:

—Mandamient nani sajrcu loj guiraaren̄i najc dee: “Bacuadiaj̄g luj, guejdx xten Israel, Dad Xtiosnu, Dad tejtis najcni. <sup>30</sup>Chanälajzlu Dad Xtioslu guideb lastoolu, näj xaimlu, näj guideb xcäriejn̄lu, näjza guideb xcäl̄nadiplajzlu.” <sup>31</sup>Sigajcza najc mandamient ni rojpga: “Huinälajz sabejn̄lu si'ctis sanälajzlu lagajc luj.” Redee najc remandamient nani sajrcu loj guiraaren̄i.

<sup>32</sup>Dxejcti räjp bejn̄ga ni najn leii lojni:

—Laaca guniilu Dad. Tejtis najc Dios, luxh ruti chu stee najc si'c laani.

<sup>33</sup>Luxh sacduxh chanälajz bejn̄ Dios guideb lastooni, näj xcäriejn̄ni, näjza xaimni, näj guideb xcäl̄nadiplajzni, luxh chanälajzni resabejn̄ni sigajc laani. Redee sajrcu loj ni rujn̄ bejn̄ che rudedren̄i gojn̄ lo Dios.

<sup>34</sup>Che bahuui Jesús laaca guniini, räjpni lojni:

—Guxii cayääd̄x te jiu'lu loj xcäl̄rnibee Dios.

Sas rutru biajxhdi gunabdiidx loj Jesús.

**Chu xi'n̄ najc Crist**

(Mt. 22:41-46; Lc. 20:41-44)

<sup>35</sup>Che caguseed̄ Jesús nen̄ guidoro, räjpni:

—¿Xho mood rnii rebejn ni najn leii Crist najc xi'n David? <sup>36</sup>Sprit Dxan xten Dios basnii David che bacuaani:

Räjp Dios loj Dad xtenä:

“Gurej ladbee xtenä, che gudzugäli reni rdxe'ch lojlu.”

<sup>37</sup>Palga lagajc David räjp: “Dad, xtenä”, che guniini xcuent Crist, ¿xhoxh najc Crist xi'n David?

Rebenxhidaal nani yu' guejdxga bacuadiagsa'creni xtiidxni.

### Gule'c Jesús xquej remastr xten leii

(Mt. 23:1-36; Lc. 11:37-54; 20:45-47)

<sup>38</sup>La<sub>l</sub>ni caguseedni rebejn, räjpni lojreni:

—Col<sub>s</sub>usin, na'c gu'chtu loj rebejn ni ruluii leii. Laareni rlajz sanäj reladsiool xtenreni. Rdxag<sub>l</sub>ajzreni rnii bejn lojreni nez lo reguii.

<sup>39</sup>Rlajzaren<sub>i</sub> cuer<sub>e</sub>ni cadro rbej renani saj<sub>c</sub>ru ne<sub>n</sub> reguidoo näjza cadro ru' relanj. <sup>40</sup>Rudzuc<sub>aj</sub>zaren<sub>i</sub> xhixten rebiuud, rniizaren<sub>i</sub> xhidalduxh diid<sub>x</sub> che ro<sub>l</sub>reni le', te rusäuureni loj rebejn. Castigwroru gac redee.

### Gojn xten te biud prob

(Lc. 21:1-4)

<sup>41</sup>Dxejcti gurej Jesús cuä' caj cadro rusäl bejn gojn. Cahuiini cagusäl rebejn meel ne<sub>n</sub> cajga. Xhidajl reni rajp cagusäl xhidajl meel nenga. <sup>42</sup>Che biäd te biud prob, basäl<sub>ni</sub> tiop melbäz ni saj<sub>c</sub> si'cti tej centaab. <sup>43</sup>Dxej<sub>c</sub>ru gurejdx Jesús rexpejn<sub>pac</sub>ni, räjpni lojreni:

—Rniliäpac lojtu, biud probre basäl<sub>l</sub> xhidajlru lo guiraa renani basäl<sub>l</sub> ne<sub>n</sub> cajre, <sup>44</sup>sa'csi guiraaren<sub>i</sub> abasäl<sub>l</sub> che'nsi xhixtenreni. Luxh

gunaare basäl<sub>l</sub> guiraa nani rajpni. Ni'ctis najc nani gaunäjni.

### Gunii Jesús sibijl guidoo

(Mt. 24:1-2; Lc. 21:5-6)

**13** Cheni sariireni ne<sub>n</sub> guidoro, räjp tej rexpejn<sub>pac</sub>ni lojni:

—Dad, bahuii lacti reguij, lacti reyu'.

<sup>2</sup>Dxejcti räjp Jesús lojni:

—¿La rhuiilu loj reyu're? Nicla tej guij diija'n dzuub yejc sa'ni, guiraliireni sire'ch.

### Recos ni gac che ameer nitloj guedxliuj

(Mt. 24:3-28; Lc. 21:7-24; 17:22-24)

<sup>3</sup>Dxejc sobga' Jesús yejc dajne' ni laa dan Oliib, cahuiini nez ro' guidooga. Che sugaxhtebreni, gunabdiid<sub>x</sub> Pedr näj Jacoob näjza Juan näjza Andrés lojni, räjpreni:

<sup>4</sup>—Gunii loonu, ¿guc gac dee? ¿Xhi guihuiinu te gacbeenu asiäddzungajxh soob guiraa rediidxre?

<sup>5</sup>Dxejcti gusloj gunii Jesús lojreni, räjpni:

—Col<sub>h</sub>uii, te rut gusgueedi la'tu, <sup>6</sup>sa'csi xhidalduxh bejn jääd con laä, gäbreni: “Narä nacä Crist”, luxh rniisireni si'c, susguezaren<sub>i</sub> xhidajl bejn.

<sup>7</sup>Che jiejn diajgtu yu' guer näj yäl<sub>n</sub>adxeeb xten guer, na'c guidx<sub>e</sub>jb<sub>tu</sub>. Nanab<sub>pac</sub> gacni; et dxejcdi nitloj guedxliuj.

<sup>8</sup>Säjs naciön yejc sanacion<sub>ni</sub>, näj yäl<sub>rn</sub>ibee yejc sayäl<sub>rn</sub>ibeeni. Xhidajl lajt saj<sub>c</sub> xu, siliaanza bejn, luxh säjs rebejn yejc sa'ni. Redee najc ni guisloj guidx<sub>e</sub>jb, gachuinza lajzni.

<sup>9</sup>Dxejc la'tu col̄susin̄ sa'csi suteedreni la'tu ladznaa reguxhtis, siguijnzareni la'tu neñ reguidoo. Sacrejdxtu lo regubieer nājza loj rereii xcāl̄nasa'c narā, te si'c gac guiniitu xtidxā lojreni.

<sup>10</sup>Nanabpac guirechxgaa xtidx Dios loj guiraa rebeñ guedxliuj. <sup>11</sup>Che guiniaazreni la'tu, che chanāreni la'tu loj reguxhtis, na'c gunxgaatu xhigab xhi diidx guiniitu. Col̄nii nani jīājttis yejctu dxejc, sa'csi xhet la'ditu ni guinii, Sprit Dxan xten Dios ni guinii. <sup>12</sup>Luxh suto' bejñ lagajc bejtzni te guet bejtzni. Suto'za dad lagajc xi'n̄ni. Sājs rebiuux yejc rexcusajnni te guet reguzajnga. <sup>13</sup>Sidxechlajz guiraa rebejñ lojtu sa'csi najctu xpenā; nani ted guiraa retrabajwre, ni'c gudeed Dios xcāl̄nabajnni.

<sup>14</sup>Che fiitu loj nani najc yālr̄dxechlajz, nani najc yālr̄runitloj, nani gunii Daniel ni gunii xtidx Dios. Che fiitu nani suga' cadro di nunyāj̄l̄ suuni, dxejcti suguxun̄ renani yu' nez Judea chāāreni nez neñ redajñ. (Nani gōl̄ guijtzre sugabeenini.) <sup>15</sup>Bejñ nani suga' yejc yu' na'c jīājtni jiu'ni neñ te yu' xca'ni gaii xhixtēni. <sup>16</sup>Nani yu' loj n̄iaa, di gal̄ jīāj̄t te xca'ni xhablajzni. <sup>17</sup>¡Aii! Xhiza nalas chu regunaa ni nuu bāz, luxh renani rusiā' xi'n̄ni, neñ redxejga. <sup>18</sup>Col̄nab loj Dios na'c sactu scree neñ rebāinajl̄. <sup>19</sup>Neñ redxejga su' trabajwduxh, nani gajd chu che bencheeli Dios guedxliuj, luxh diruni chu, dxejctis chuni. <sup>20</sup>Paru di Dad gusia'tz redxejga, nicla tej bejñ di laa. Susia'tzni redxejga sa'csi sanāljazni rexpejn̄ni nani aguleni.

<sup>21</sup>Dxejc palga yu' chu naa lojtu: “Col̄huii, aree Crist”, o “Col̄huiire, ani suga' rec”, na'c chalilajztuni.

<sup>22</sup>Sa'csi su' bejñ nani rniisi najcni Crist. Su'za reniguii nani rniisi rniireni xcuent Dios. Sujnzareni milaagwr, te gusgueerēni, te palga sajcn̄i, r̄lajzreni gusgueelireni renani agule Dios. <sup>23</sup>Ni'cni la'tu col̄susin̄; agunixgā lojtu guira'ti ni gac.

### Xho gac che jīād̄d Xi'n Dios ni gujc Niguii

(Mt. 24:29-35, 42-44; Lc. 21:25-36)

<sup>24</sup>Neñ redxejga, cheni luux retrabajwduxhga, sicājy lo gubijdx, luxh diru bāii gusanij. <sup>25</sup>Sitejb rebal̄xhaguibaa, sinibsejs recos nani nasnāj rebal̄xhaguibaa. <sup>26</sup>Dxejcti suhuii rebejñ loā, Xi'n Dios nani gujc Niguii, siälā neñ reza guideb yālr̄n̄beduxh xtenā, nājza xcāl̄dimbicha'ā. <sup>27</sup>Dxejcti guxhal̄gacā rexanglā jīād̄tojpreni renani guleā guideb lo guedxliuj, cat nalooli guedxliuj nājza cadro nalooli guibaa.

<sup>28</sup>Col̄guisieed nani ruluii yagiigw. Cheni rii rebāte' lojni luxh che rcaj balajc lojni, acaxhnajntu bāii gusguij asadzungajxh. <sup>29</sup>Sigajcza, che fiitu acayajc recosre, sabeetu asiād̄gaxhā, ameer guidzunā. <sup>30</sup>Rniliāpac lojtu, rebejñ ni nabajn̄ dxejc, direni nitloj, fixgaareni gac recosga. <sup>31</sup>Sinitloj guibaa nājza guedxliuj, rextidxā di nitloj.

<sup>32</sup>Naj, rut najndi guc gac recosga, nicla rexangl Dios ni yu' xhaguibaa, niclaza narā Xi'n Dios, Xtadātis najn.

<sup>33</sup>Col̄huii, col̄susin̄, col̄nab loj Dios, sa'csi ditu gan guc guidzujñ

redxejga. <sup>34</sup>Dee najc si'c najc te bejn ni birii sää zijt. Che gajdlini guirii, badeedni xtzun rexmosni, luxh gunibeezani susin̄ nani canäj rolä'. <sup>35</sup>Si'cza col̄susin̄, sa'csi ditu gan guc jiaäd baxhuaan yu'ga, la jiaädni gudxej, o la jiaädni garol yääl, o la cäy, o la jiaädni rsil. <sup>36</sup>Col̄susin̄, te di guiga'tu nagayejstu che guidzuj̄ni. <sup>37</sup>Rediidx nani rniä lojtu, loj guiraa rebejn̄ rniäni: col̄susin̄.

### Ruchaagreni diidx te guiniaazreni Jesús

(Mt. 26:1-5; Lc. 22:1-2; Jn.11 :45-53)

**14** Riäädx tiop dxej guidzuj̄n lanij, dxej ni ruzaa lajzreni gułaareni ladz̄naa reEgipto. Nen redxejga rajwreni yätxtiil nani di saguij. Rebixhojz nani rnibee nen guidoo xten rexpejn̄ Israel näj rebejn̄ ni ruluii leii rlaizreni niniaazreni Jesús con yäl̄rusguee, te nugu'trenini. <sup>2</sup>Dxejcti räjpreni lo sa'reni: —Na'c jiennu scree nen̄ redxelani, te na'c gun benguejdx biey.

### Te gunaa ni basäl se't yejc Jesús Betania

(Mt. 26:6-13; Jn.12 :1-8)

<sup>3</sup>Yu' Jesús Betania, rolijz Simón, nani guyu' guejch ni rał tiejxhni. Che sobga'ni lo mex, biääd te gunaa ca' te bo'tguij yu' setnard nen̄ni. Rlianexhduxhni, sacduxhni. Dxejc gudi'chni yejn bo'tguijga, te basäl̄ni se'tga yejc Jesús. <sup>4</sup>Yu'za gaiireni ro'c ni bidxe'ch, räjp loj sa'reni: —¿Xhicuent banijtni setnejxhga? <sup>5</sup>Paru nido' se'tga, nijni si'cti chon̄ gayuu denar, te nica' meelga rebejn̄ ni xhet rajpdi meel.

Luxh caguidxa'reni loj gunaaga. <sup>6</sup>Dxejc räjp Jesús lojreni: —Col̄saanni, ¿xhicuent rudxojntu nani cayujn̄ gunaare? Cos sacduxh dee bennäjni narä. <sup>7</sup>Guideb ni guibajntu, su' rebejn̄ nani xhet rajpdi lojtu, luxh che rlaiztu sajc gacnäjtoreni. Narä et xchejdi chu'ä lojtu. <sup>8</sup>Gunaare abejnni nani gujctis bejn̄ni. Abaslanexhxaani tiexhä, te chää tiexhä nen̄ baa. <sup>9</sup>Rniliápac lojtu, cadrotis guidzuj̄n xtidx Dios, guideb lo guedxliuj, siniizareni xcuent nani bejn̄ gunaare, te guinaj lajzreni gunaare.

### Rlaiz Judas guto' Jesús

(Mt. 26:14-16; Lc. 22:3-6)

<sup>10</sup>Dxejcti huij Judas Iscariot, nani najc tej retzubitio'p xpejn̄pac Jesús, loj rebixhojz nani rnibee te guto'ni Jesús lojreni. <sup>11</sup>Che biejn̄ diaj rebixhojz xtiidxni, bibalajzreni. Räjpreni sudeedreni meel lojni. Dxejcti caguuil Judas xho guto'ni Jesús.

### Gudauxchej Dad con rexpejn̄pacni

(Mt. 26:17-29; Lc. 22:7-23; Jn.13 :21-30; 1Co. 11:23-26)

<sup>12</sup>Biu'ti xmaan che rajwreni yätxtiil ni di saguij. Dxej lanijga, rugu'treni xiil, te ruzaa lajzreni dxej ni gułaareni ladz̄naa reEgipto. Räjp rexpejn̄pacni loj Jesús: —¿Caro rlaizzlu chosucheenu te gauulu nadxej, dxelani? <sup>13</sup>Dxejc baxhał̄ni tiop rexpejn̄pacni, räjpni lojreni: —Col̄chäj nen̄ guejdx, ro'c guidxaagtu te niguii ni nuu te re' nis. Col̄chanajl niguiiga. <sup>14</sup>Cadro jiu'ni colye'tz loj bejn̄ ni najc

rolizjni ro'c: "Naj Dad mastr, ¿con yu' cadre ria'n rebiooz, cadre gaunäjni rexpejn̄pacni nadxej, dxelanij?" <sup>15</sup>Dxejcti guluiini lojtu te yu' ni sojb jiaaliga yejc sa'ni, ni asuchexгаа nenni. Coļyujn xhi guidaunu ro'c.

<sup>16</sup>Sas huij rexpejn̄pacni, bidzujn̄reni nen̄ guejdxga. Bidxälreni te yu' si'cni räjp Jesús lojreni. Ro'c bejnreni xhi gudajwreni dxelanij.

<sup>17</sup>Che huääz gubijdx, bidzunnäj Jesús guitzubitio'p xpejn̄pacni.

<sup>18</sup>Lałni sobga'reni lo mex cayajwreni, räjp Jesús lojreni: —Rniliápac lojtu, tej la'tu ni cayaunää, suto'ni narä.

<sup>19</sup>Dxejcti gusloj cayac-huin lajzreni, räjp tebgajreni lo Jesús: —¿La naräni?

Räpgajc steeni:

—¿La naräni?

<sup>20</sup>Dxejcti guniini, räjpni lojreni: —La tej retzubitio'p, tej ni cayajw loj xpla'tä. <sup>21</sup>Sa'csi narä Xi'n Dios nani gujc Niguii, sia'ä, si'cpacni caj loj xtiidx Dios, per xhiza nalajz niguii ni guto' narä. Huentejti na'c niagl niguiire.

<sup>22</sup>Lałni cayajwreni, cua' Jesús yätxtiil, badeedzani xquixhtiooz loj Dios dxejc guļa'nini, badeednini lojreni. Dxejcti räjpni:

—Coļca' yätxtiilre. Dee najc si'c tiexhä.

<sup>23</sup>Cuagajcni te bas. Che abadeedni xquixhtiooz loj Dios, badeednini lojreni, gu' guiraareni nen̄ basga.

<sup>24</sup>Dxejcti räjp Jesús lojreni:

—Dee najc si'c xtienä ni ruluii diidx ni biä'nnu, nani guixe' xcuent xhidajl rebejn̄. <sup>25</sup>Rniliápac lojtu,

diruna yä'ä bin nani rii yejc uub, dxejli yä'äni stehuält loj xcäl̄rnibee Dios.

**Gunii Jesús sinii Pedr dini gumbeeni**

(Mt. 26:30-35; Lc. 22:31-34; Jn.13 :36-38)

<sup>26</sup>Che gulujx bil̄reni te dij xten Dios, biriireni, sääreni nez dajne' ni laa dan Oliib. <sup>27</sup>Dxejcru räjp Jesús lojreni:

—Guiraatu sibälaztu narä naguxhij̄n, sa'csi si'c cajni lo guijt̄z: "Sugu'tä baxhtoor luxh suxun̄ rexiil."

<sup>28</sup>Che guibaṅsacä loj rebengut, ganidä cha'a Galilee, dxejcti jääd̄tu.

<sup>29</sup>Dxejc räjp Pedr loj Jesús:

—Palga guiraareni cuälazlu, narä dina cuälazälu.

<sup>30</sup>Dxejc räjp Jesús lojni:

—Rniliápac lojlu, lagajc guxhij̄nre, nicla gajd guidgaii cuedxa' tiop huält, luj aguiniilu choṅ huält dilu gumbee narä.

<sup>31</sup>Luxh laani sanuutis xtiidxni, räjpni:

—Cadro guetlu setäza, dina guiniä dina gumbeälu.

Luxh guiraa rexpejn̄pacni gunii si'c.

**Gunab Jesús loj Dios che yu'ni**

**Getsemaní**

(Mt. 26:36-46; Lc. 22:39-46)

<sup>32</sup>Dxejcti bidzujn̄reni te lajt cadre laa Getsemaní. Dxejc räjpni loj rexpejn̄pacni:

—Coļc̄uej ree lałni chanabä lo Dios.

<sup>33</sup>Dxejcru sanäni Pedr näj Jacoob näjza Juan. Dxejc gusloj cayac-huinuxh lajzni, luxh cayu'ni yäl̄rsiaduxh. <sup>34</sup>Dxejc räjpni lojreni:

—Cayac-huinuxh lazä, an sugu'tni narä. Coļjia'n ree, cołtie'ch bacäl.

<sup>35</sup>Sas gusajni tla', bazuxhijbni lo uuj, dxejcti gunabni lo Dios don la niajc nidedcaj nani sacni dxejc.

<sup>36</sup>Räjpni:

—Abba, xtaä, luj rajc rujnlu guira'ti: badzucaj retrabajwre loä. Xhet si'cni rlazädi narä, bejn si'cni rlanjzlu luj.

<sup>37</sup>Dxejc biäädni gunaaznireni nagayejsreni. Dxejc räjpni lo Pedr:

—Simón, ¿la nagayejslu? ¿La nicla te rate' diniajcdi nutie'chlu bacał? <sup>38</sup>Coltie'ch bacał, colnab lo Dios, te na'c guntu dojl. Lastootu rlanj gutie'chtu bacał, luxh tiejxhtu abadxajc.

<sup>39</sup>Huij Jesús stehuält, binabni loj Dios, guniini lagajc rediidx ni guniini galoo. <sup>40</sup>Dxejcti biädsacni cadro tre'reni, gunazsacnireni nagayejsreni, sa'csi yuduxh bacał lojreni. Luxh direni nidxäl xhi niniireni lojni. <sup>41</sup>Ni riojn huält biäädni, dxejc räjpni lojreni:

—Agojl colguejs, colsilajz, agujc, abidzujñ or ni ted Xi'n Dios ni gujc Niguii ladzñaa rebendojl. <sup>42</sup>Colchastie, colcho'. Asiäddzungajxh ni guto' narä.

### Gunaazreni Jesús

(Mt. 26:47-56; Lc. 22:47-53; Jn.18 :2-11)

<sup>43</sup>Canisijcni scree, che bidzujñ Judas, ni najc te retzubitio'p xpejnpacni, siädñani xhidajl bejn. Ca'reni spaad, ca'reni yajg biriireni lo rebixhojz nani rnibee, näjza rebejn ni ruluii leii, näjza rebengool nani najc guxhtis. <sup>44</sup>Niluxh nani ruto' Jesús abadeedni te seen lojreni, räjpni:

—Nani guchagro'ä, ni'c najc laani. Colnaazni, colyaptzu'tzni te si'c chanätuni.

<sup>45</sup>Che bidzujñ Judas, gubigni loj Jesús, räjpni lojni:

—Dad, Dad.

Sas bachagro'nini. <sup>46</sup>Dxejcru gunaazreni Jesús ro'c.

<sup>47</sup>Dxejc tej reni suga' ro'c, gulää xspaadni, gudilguijdxni xmos bixhojz nani sajcru, batiu'ni diajgni.

<sup>48</sup>Dxejc räjp Jesús loj rebejn:

—¿La siädxhiitu narä con spaad näjza garo't si'c rixiitu te gubaam?

<sup>49</sup>Guiraa dxej guyu'ä lojtu nen guidoo, caguluiätu xtidx Dios luxh ditu niniaaztu narä. Scree cayajcni, te soob diidx ni caj lo reguijtz.

<sup>50</sup>Dxejcru rexpejnpacni gulälazrenini, baxuntireni.

### Bi'n nani baxun

<sup>51</sup>Sanajlza te bi'n Jesús, nadejbni ganaxhtis te bariaad. Si'c gunaazrenini. <sup>52</sup>Dxejcti baxunni, libasa'nni bariaadga, sä'tini xhabäälni.

### Suga' Jesús loj reguxhtis

(Mt. 26:57-68; Lc. 22:54-55, 63-71; Jn.18 :12-14, 19-24)

<sup>53</sup>Dxejc biädñareni Jesús loj bixhojz ni sajcru. Bidojp rebixhojz nani rnibee, näj rebengool ni najc guxhtis, näjza rebejn ni ruluii leii. <sup>54</sup>Luxh Pedr zijt zijt sanajlni Jesús. Che bidzujñtini lo xle' bixhojz ni sajcru, gurenäjni rebejn nani rajp ro'c, cagucha' lajzni lo bajl.

<sup>55</sup>Rebixhojz nani rnibee, näjza guiraa rebengool ni najc guxhtis, caguiilreni xhi tej xquej Jesús nidxälreni, te nugu'treni Jesús, xhet bidxälireni. <sup>56</sup>Xhidajl bejn gunii didxxhii, räjpreni et laadi rujn Jesús, niluxh di xtiidxreni nile', sa'csi

garen garen guniireni. <sup>57</sup>Dxejc huisulii gaii bejn ni guniireni stee didxxhii xcuent Jesús, rájpreni:

<sup>58</sup>—Nuunu biejn diaagnu guniini: “Sutiexhá xyu' Dios ni guc-chee con naa rebejn, luxh chontis dxej guncheä steeni, ni nac-chee et con naadi rebejn.”

<sup>59</sup>Nicla si'c di xtiidxreni nile', sa'csi garen garenza guniireni.

<sup>60</sup>Dxejcti huisulii bixhojz ni sajcru galäii guiraa rebejn, gunabdiidxni loj Jesús rájpnj:

—¿La digacdi guiniilu xhi guiniilu xcuent requej ni cabe'c reniguiire, ä?

<sup>61</sup>Laani niäuuutis ro'ni, xhet guniidini. Dxejcti gunabdiidxsac bixhojz ni sajcru lojni, rájpnj:

—¿La luj ni najc Crist, xi'n Dios nani rliä'p bejn xpala'nni, ä?

<sup>62</sup>Dxejcti rájp Jesús lojni:

—Naräni. Suhuiitu loä, Xi'n Dios nani gujc Niguii, sobga'ä xladbee Dios ni rnibee, siäläza nen reza ni tre' xhaguibaa.

<sup>63</sup>Dxejcru bixhojz ni sajcruga, batiäjsni tla' xhajnbi, rájpnj:

—¿Xhi jienrunu guidiilnu diidx xcuentni? <sup>64</sup>Abiejn diajgtu xho guniyajni Dios. Naja', ¿xhi najtu?

Dxejcti guiraareni rájp nungäjlpac guetni.

<sup>65</sup>Dxejc yu' reni gusloj cagutiobxhejn lojni, luxh basäuureni lojni, dxejc huääzrenini, rájpreni lojni:

—Gunii, ¿chuni'c huääzlu?

Luxh renani canäjni gudajp lojni.

### Gunii Pedr dini gumbée Jesús

(Mt. 26:69-75; Lc. 22:56-62;

Jn.18 :15-18, 25-29)

<sup>66</sup>Dxejc suga' Pedr lo yuj, nez lo le'ga, che biääd te xcriaad bixhojz

ni sajcru. <sup>67</sup>Luxh bahuiini cagucha' lajz Pedr, cadxelojni lojni. Dxejcti rájpnj:

—Näj luj nadxaaglu Jesús ni siääd Nazare't.

<sup>68</sup>Dxejc Pedr basgueeni, rájpnj:

—Dina gumbéäni. Dizana ganä xhini'c caniilu.

Dxejcti biriini sääni ro' suaan. Dxejcti guredxa' guidgaii. <sup>69</sup>Dxejc bahuisac criaadga lojni, rájpnj loj renani suga' ro'c:

—Niguiire najc laa tejreni.

<sup>70</sup>Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni näj luj najclu tejreni, sa'csi ben Galileelu, luxh guyasi riejn rniilu si'c rni reben Galilee.

<sup>71</sup>Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumbéä niguii nani caniiitu.

<sup>72</sup>Dxejcti barojp huält guredxa' guidgaii. Dxejc banalajz Pedr nani rájp Jesús lojni: “Che gajdli guidgaii cuedxa' tiop huält, luj gacla chon huält aräjplu dilu gumbée narä.”

Dxejc guslojni cayoوني.

### Suga' Jesús loj Pila't

(Mt. 27:1-2, 11-14; Lc. 23:1-5; Jn.18 :28-38)

**15** Che bara yääl bidxaag sa' rebixhojz ni rnibee, näj rebengool ni najc guxhtis, näjza rebejn ni ruluii leii, näjza giralii reguxhtis. Dxejcti gusloj cachaagreni diidx xho gunreni. Baliibreni Jesús, sanätirenini, niluxh badeedrenini loj Pila't. <sup>2</sup>Dxejc gunabdiidx Pila't loj Jesús rájpnj:

—¿La luj ni najc reii xten rexpelj Israel, ä?

Räjp Jesús lojni:

—Si'cni guniilu, si'c najcni.

<sup>3</sup>Dxejc gusloj rebixhojz nani rnibee cabe'c rexquej Jesús.

<sup>4</sup>Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'creni.

<sup>5</sup>Bidxeloj Pila't sa'csi nicla si'c xhetru guniidi Jesús.

### Gunibeereni guet Jesús

(Mt. 27:15-31; Lc. 23:13-25; Jn.18 :38-19:16)

<sup>6</sup>Dxelanijpac ruslaa Pila't tej rebejn ni yu' latzguiib. Ruslaani chutis te ni rniab rebejn. <sup>7</sup>Lo rebejn ni yu' latzguiib nadxaag te niguii ni laa Barrabás. Bagu'tni te bejn che nu'chni lo te cuaa bejn ni gudiñaj gubieer. <sup>8</sup>Dxejc bidojp xhidajl bejn loj Pila't, gunabreni lojni gunni si'ctis rujnni casob lanij. <sup>9</sup>Dxejc gunabdiidx Pila't lojreni, räjpni:

—¿La rlanjtu guslaá reii xten rexpelj Israel, ä?

<sup>10</sup>Sa'csi gucbegajcni rdexchlajz rebixhojz loj Jesús, ni'c bateedrenini lojni. <sup>11</sup>Ni'cni baquuilza rebixhojz ni rnibee rebenxhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

<sup>12</sup>Dxejc räjp Pila't lojreni stehuält: —¿Xhini'c rlanjtu gunnä nani rniitu reii xten rexpelj Israel?

<sup>13</sup>Dxejcro guredxa'reni:

—iBacuaani lo crujz!

<sup>14</sup>Dxejc räjp Pila't lojreni:

—¿Xhini'c xhet laati bejnni?

Dxejcti laareni rbedxa'rueni:

—iBacuaani lo crujz!

<sup>15</sup>Baslaati Pila't Barrabás, sa'csi rlanjzi nuspaani lajz rebenxhidaal.

Che gulujx gunibee Pila't, bia Jesús. Bateedti Pila't Jesús loj rexsoldaadni, te xcaini loj crujz.

<sup>16</sup>Dxejc huinä rexsoldaadni Jesús nen Pretoor, yu' cadre rujnreni yälguxhtis, ro'c batojpreni guiraa resa'reni. <sup>17</sup>Dxejcti bashuajcwreni Jesús te lad moraad, bencheereni te coron guejch basälreni yejcni. <sup>18</sup>Guslogajc caguxhi näjrenini, caniiireni lojni:

—iColguiliä'p xpala'n reii xten rexpelj Israel!

<sup>19</sup>Batiäjlreni te yabixhijl yejcni, batiobxhejnreni lojni, luxh guzuxhijbreni te rajnrenini.

<sup>20</sup>Che gulujx basacsíreni Jesús, gulääreni lad moraad ni najcwni, sas bashuajcwrenini xhajbpani. Gulägajczeni Jesús te cuaarenini lo crujz.

### Bacuaareni Jesús loj crujz

(Mt. 27:32-44; Lc. 23:26-43; Jn.19 :17-27)

<sup>21</sup>Te niguii ni laa Simón, ni siääd Cirene, sadejd ro'c, bazajni lo nejz. Niguiire najc xtad Alejandro näjza Rufo. Che sadejdni nejzga, la fuerz basguurenini xcrujz Jesús.

<sup>22</sup>Dxejcti huinäreni Jesús cadre laa Gólgota, nani säloj: dan Calabeer. <sup>23</sup>Ro'c badeedreni lo Jesús bin nani nu'ch mir lojni, dxejc laani naaddini niä'ni binga. <sup>24</sup>Che gulujxti bacuaareni Jesús loj crujz, gudzujtreni yejc rexpelj, te don xhini'c xca' tejjarenini.

<sup>25</sup>Agujc choñ or gulejn gubijdx che bacuaareni Jesús lo crujz.

<sup>26</sup>Letreer cadre bacuaareni xtojlni scree bejnrenini: “Reii xten rexpelj Israel.” <sup>27</sup>Bacuaazareni lo stiop crujz tiop gubaan, tejni xladbee



Jesús, xtee xladbäjägwini. <sup>28</sup>Dxejc guzobj diidx ni caj loj guijtz nani nrii: “Loj rebenguijdx bigabni.”

<sup>29</sup>Luxh renani sadejd nejzga guniyajreni Jesús, cagusniibreni yejcreni, räjpreni lojni:

—iJaa! Luj nutiejxhlu guidoo luxh chontis dxej niunchesacluni. <sup>30</sup>Naj baslaa lagajc luj, biäjt loj cruizga.

<sup>31</sup>Näjza rebixhojz ni rnibee, näj rebejn ni ruluu leii, baxhiznärenini, räjp loj sa'reni:

—Ste'ca bejn ruslaani, xoxh digacdi guslaani lagajc laani. <sup>32</sup>Naj sujiäjt Cristre, reii xten rexpejn Israel, lo cruiz te guihuiinu, te chalilaaznu.

Näj regubaaan ni caj lo cruiz guniyajzarenini Jesús.

### Xcälgujt Jesús

(Mt. 27:45-56; Lc. 23:44-49; Jn.19 :28-30)

<sup>33</sup>Che gojł läidxej, bicäy si'cti chon or. <sup>34</sup>Che gudejd chon orga, guredxa' Jesús dipro, räjpni con xtiidxni:

—Eloi, Eloi, ¿lama sabactani? — dee säloj: Xtiozä, Xtiozä, ¿xhicuent gulälazlu narä?

<sup>35</sup>Biejn diajg gaii bejn ni suga' ro'c räjpni si'c, dxejc räjpreni:

—Colcuadiajg, Elías cabejdxni.

<sup>36</sup>Sas baxun tejni, bahuajdxni te sponj loj binagr. Dxejcru basäl'nini yejc te yabixhijł, badeednini loj Jesús te yänini, räbgajcni:

—Colgusaan guihuiinu don la siädläjd Elíasni loj cruiz.

<sup>37</sup>Dxejcru guredxaduxh Jesús, gujttini. <sup>38</sup>Dxejc lajd ni najł nen guidoro biräjsni, gujcni tiop la', jiaali lo yujli. <sup>39</sup>Suga' capitán nani rnibee te gayuu soldaad nez

loj Jesús, luxh che bahuuini xho guredxa' Jesús scree näj xho gujtñi, räjpni:

—Guli'pacni, niguiire najc Xi'n Dios.

<sup>40</sup>Suga'za gaii gunaa, zijt cadxelojreni. Lojreni yu' Marii Magdalen, näj Marii, xnan Jacob ni najc huinru, näjza José, näjza Salomee. <sup>41</sup>Che guyu' Jesús Galilee birinajł regunaare Jesús, luxh bahuuirenini. Yu'za xhidajlru regunaa ni biädnał Jesús che biädni Jerusalén.

### Biga'tz Jesús

(Mt. 27:57-61; Lc. 23:50-56; Jn.19 :38-42)

<sup>42</sup>Biu' gudxhijł, luxh najcni dxe bispr che rusucheereni par sabd, dxej ni rusilajz rexpejn Israel.

<sup>43</sup>Biäd José ni siäd Arimatea, najcni te rebejn ni sajč loj reguxhtis.

Näjza laani cabäjnzi xcäl'rnibee Dios. Guideb yäl'nabajł gunabni tiexh Jesús lo Pila't. <sup>44</sup>Bidxelo Pila't alagujt Jesús, sas gurejdxni capitán ni rnibee tej gayuu soldaad,

gunabdiidxni lojni la balagujt Jesús. <sup>45</sup>Che räjp capitángu lojni agujt Jesús, dxejc badeed Pila't

tiexh Jesús loj José. <sup>46</sup>Agusii José te bariaad, luxh che gulätñi Jesús

lo cruiz, batejbnini nen bariaadga. Dxejc gudixhni Jesús nen te

biliää ni caj cuä' te guilaj, dxejcru batzugini te guiro ro' biliääga.

<sup>47</sup>Bahuu Marii Magdalen näj Marii xnan José cadre biga'tz Jesús.

### Huäjz Jesús loj rebengut

(Mt. 28:1-10; Lc. 24:1-12; Jn.20 :1-10)

**16** Che gudejd sabd, dxej ni rusilajz rexpejn Israel,

Marii Magdalen náj Marii xnan  
Jacob nájza Salomee gusii setnejxh  
te chatääbreni se'tga tiexh Jesús.

<sup>2</sup>Che biu' xmaan, rsildooru, che  
calejn gubijdx, biäädreni ro' xpaani.

<sup>3</sup>Cayájp loj sa'reni:

—¿Chu gudzucaj guiroga ro'  
xpaani te jiu'nu?

<sup>4</sup>Che gudixhlojreni, bahuiireni  
alagubicaaj guijga, luxh najcni  
te guiroduxh. <sup>5</sup>Che biu'reni neñ  
biliääga, bahuiireni lo te bi'n sobga'  
ladbee neñ biliääga. Najcw bi'nga  
te ladnol ni najc siool. Dxejc bidxejb  
regunaaga. <sup>6</sup>Dxejcti rájp bi'nga  
lojreni:

—Na'c guidxejbtu. Caguiiltu Jesús  
ni siääd Nazare't, nani cuaj lo cruzj.  
Rutiruni ree. Agubajñni lo rebengut,  
coltahuii cadro gudixhreni  
tiejxhni. <sup>7</sup>Colchäj, colchaye'tz lo  
rexpejnpacni, loj Pedr, ganidla  
Jesús guidzujñ Galilee, dxejcti  
guidzujñtu. Ro'c fiitu lojni, si'cni  
guniini lojtu.

<sup>8</sup>Biriitireni ro' biliääga,  
racesjlireni sa'csi cadxejbreni.  
Rut lojdi guniidireni sa'csi  
cadebduxhreni.

### **Baluiloj Jesús loj Marii Magdalen**

(Jn. 20:11-18)

<sup>9</sup>Gubajñ Jesús loj rebengut  
rsildooru che biu' xmaan. Baluilojni  
galoo loj Marii Magdalen, nani  
agacgulääni gajdz beñdxab neñ  
lastooni. <sup>10</sup>Dxejcti huij Marii  
Magdalen, huiye'tzni loj renani  
cuansañ Jesús, renani cayac-  
huin lajzni, cayoonreni. <sup>11</sup>Che  
biejn diajgreni ahuäzsac Jesús lo  
rebengut, luxh Marii abahuii lojni,  
di lajzreni nilii.

### **Baluiloj Jesús loj tiop xpejnpacni**

(Lc. 24:13-35)

<sup>12</sup>Ste'ca najc Jesús baluilojni loj  
tio'p renani sasaj sääreni lo nejz.

<sup>13</sup>Dxejcti gubi'reni, huiye'tzreni loj  
sgaiiga, luxh nicla xtidx reni'c di  
lajzreni nilii.

### **Baxhal Jesús repost**

(Mt. 28:16-20; Lc. 24:36-49; Jn. 20 :19-23)

<sup>14</sup>Lult baluilojni loj  
guitzubiteebreni che sobga'reni lo  
mex. Gudidxa' Jesús lojreni, sa'csi  
di lajzreni nilii luxh guyaa lajzreni.  
Di lajzreni nilii xtidx renani bahuii  
loj Jesús che gubangajcni loj  
rebengut. <sup>15</sup>Rájp Jesús lojreni:  
—Colchäj guideb lo guedxliuj,  
colnii xtidx Dios lo guiraa  
rebejn. <sup>16</sup>Nani chalilajz luxh  
tiobnisni, siliaani loj dojl; biäda  
nani di lajzni chalii sinijtñi lo  
dojl. <sup>17</sup>Niluxh remilagwre jiannäj  
renani chalilajz: sibääreni beñdxab  
xcuentä; siniireni ste'ca diidx;  
<sup>18</sup>guiniaazreni bäl con ñaareni;  
masque yäreni xhicos ni rugu't bejn,  
xhet gacdireni; susujreni ñaareni  
yejc rebenracxhuu luxh siajc  
rebenracxhuu.

### **Huä'p Jesús xhaguibaa**

(Lc. 24:50-53)

<sup>19</sup>Gulujxti gunii Dad Jesús  
si'c lojreni. Dxejc huäjsni sääni  
xhaguibaa. Ro'c huicueni cuä'  
Dios ladbee. <sup>20</sup>Dxejcti laareni  
bire'chreni, guniireni xtidx Dios  
guiranejz. Lagajc Dadga gucnäjreni,  
bejnñi milagwr te gucbee bejn  
laapac xtidx Dios ni caniireni.  
Sugacni si'c.